

名牧遺徽

C  
922.07  
5H

10-2H

10924

LIVES  
OF  
PROMINENT CHINESE PASTORS

---

BY  
H. L. ZIA

---

PRICE TWENTY CENTS PER COPY, POSTAGE PREPAID

---

FOUNDED 1911  
ASSOCIATION PRESS OF CHINA

3-4 Qidun Road

SHANGHAI

1924

# 名牧遺徵

敘

數年前。余曾編布道小叢書四種。曰基督教與大國民。曰天國偉人。曰播種與收穫。曰中國耶穌教會小史。擬更取吾國牧師之著者。綴其行述。輯為一冊。以期後世有裨。而讀之。可發皇布道之心志。中間匆匆以事未果。而此願固未嘗忘也。今秋裴君德士重提此意。余曰是固余志。而苦材料不富。不足以興趣味。奈何。無已姑就聞見所及者。擇其十人。泐為此編。記事記言。或簡或詳。均有來歷。不敢本己意為輕重。諸先生各隨其時其地。見其獨到之精神。惜記載未詳。無由一一傳出。斯為憾事耳。此册限於耳目。傳人不多。未免貽掛漏之誚。各處同志。如有名牧之誌狀傳記。不吝見示者。他日更當彙為續編。庶有當於闡揚先哲。啟導後生之微意歟。

教主降生一千九百十五年十二月古越謝洪資識於虎林寄廬

B979.92  
43

名牧遺徵 敘



NORTH CHINA UNIVERSITY OF SCIENCE AND TECHNOLOGY  
SCHOOL LIBRARY

名牧遺徽

目次

- 篇一 謝錫恩先生事略  
篇二 顏永京先生事略  
篇三 許揚美先生事略  
篇四 席子直先生事略  
篇五 陳大鏞先生事略  
篇六 黃品三先生事略  
篇七 謝談庵先生事略  
篇八 孟繼賢先生事略  
篇九 王煜初先生事略  
篇十 何福堂先生事略

# 名牧遺徵

謝錫恩博士事略

篇一

博士者福建美以美會先輩之著名牧師也。姓謝氏。名錫恩。字秉圭。作詩文自署曰蓮峯居士。曰臥雲山人。曰悟真子。福州侯官人也。以一千八百三十五年生。道光十五年。世居城北三十里之蓮峯村。土名葉洋。父名神求。以大父晚年求諸廟神。始得此子也。鍾愛異常。雖讀書。不使攻苦。家世業農。稱小康。雇傭頗衆。父性忠厚。半耕半讀。終其身。母賢。相夫治家。善待賓客。同胞弟妹五人。博士居長。父母期以讀書起家。故從師肄讀。凡十餘年。九齡時。見玉歷抄傳一書。內有圖繡惡人死後在冥中受種種苦惱。鬼卒在旁行刑。或鋸。或磨。或下油鍋。或受炮烙。各等慘刑。使人駭然。善人則轉生受福。得爲貴顯。以此中心勉勵。定志一生當爲善人。不敢作惡。年十一。肄業福州省垣。益自淬厲。居常靜默。廉樸自守。不同浮俗。同學咸尊重焉。迨年十三。四深覺父母養育劬勞。思効圖上進。以報親恩。嘗應府縣試。俱得首列。蓋志在舉業也。十六歲。慈母見背。三弟一

妹俱賴老父照料。不勝其勞。父遂命博士去儒冠而服農。博士性雖篤好詩書。恐傷父心。不敢不從。奈體素羸弱。不勝耕耘。親友因爲之設一村塾。使執教鞭。諸弟從學。蓋兄也。而兼撫養之責矣。教學既可自脩。又得修脯以省老父擔負。計良得也。時年十八歲矣。博士待弟友愛。初同學。後爲之師。弟有失。婉言規勸。不忍傷其意。嘗外出。聞四弟觸父之怒。急馳歸。弟見兄歸。大驚。以爲必受痛責。博士乃歡如平日。絕不一言及之。次日清晨。招弟至僻靜處。柔聲詢之曰。弟何爲失禮。激父之怒乎。弟聞言悔悟。請罪於父。而後已。是年授徒之時。偶聞隣人有信仰基督者。俗稱之曰奉教。博士心異之。以爲彼非人類。不可與同羣。一日入友人書齋。遇一信道之士。因詢以何故奉教。且教中有何奧理。信士爲略述創世之來歷。人生之本原。博士聞而潛心思考。以爲其所言頗似有理。其後又有傳道者至。博士書齋談道。至一時之久。博士喪耳如無聞焉。迨傳道者去。始覺其人之容貌和善。言語婉轉。頗可效法也。傳道者又贈以小書二冊。勸之閱覽。他日又來博士之寓。詢以前日所贈之書。曾否細閱。博士實未展卷。漫應之曰。已讀之矣。

傳道者因更與談道若干時而後別。博士面聆而心厭之。次年博士授課之館。距禮拜堂僅二里。一日有信徒邀之至堂觀禮。博士入堂。其心固不願聽說教。而欲去不得。身如受縛。因強坐衆中。如倚鐵氈。久之頗悟偶像之虛幻。見人有詆毀聖教者。輒爲之剖白。以爲其道固有是處。非可蔑視也。同治癸亥秋。友人薦博士授西士以國文。一日在牛坑禮拜堂。聞李森美牧師講道。侃侃誨人。諄諄證道。表示宇宙之內有一大主宰。其言清晰異常。博士聞之有悟。如撥雲霧而覩青天。自此遂猛進於道。是非邪正之途。截然分明。而祖國一切陋風謬俗。全屬虛妄。亦已了然於胸。以爲立身當憑真理而行。方不至誤。又嘗聞傳道者論審判之理。心更悚然。爲之不寧者數日。旋自慰曰。我年力尙富。來日方多。何必作死亡之計。因此向道之心爲之一挫。惟恐屢聞斯道。而終爲耶穌之徒。遂決意疏遠之。甲子年春正月杪。就館於西門外。將聖經束之高閣。居數日。心殊煩悶。不解所由。縱有友朋敘談。仍不能釋然。如是逾月。途經牛坑禮拜堂。入而聽道。正值美國教士薛承恩先生亦在。博士與之談論。並晤信道之士多人。歡談久之。胸懷頓

暢。乃悟前日之鬱鬱。因遠離道友故也。於是向道之心。又爲之一振。適五齡之長子染疾。親友咸勸博士禱之於某廟。博士雖尙未進教。胸中已有定見。謂人之生死。上帝主之。廟中神像。又何能爲。弗聽。長子竟殤。家人親戚咸咎博士之慢神。獲譴。博士忍之而已。及反塾。則居停已得人言。知博士喪子。面譏博士之愚。以慢神而獲災。博士處之自如。一以正道自遣。而爲眞理作證之念。勃起於心。急欲得其人而語之。適館隣有一不識字之人。喜聆博士之言。聞道一二次。卽起信心。取家中所供偶像棄之。且虔守安息日。自後來博士館中聽道者。日不乏人。亦有慢罵怒斥者。博士夷然不之較。市中有設小肆者。聞博士之言。悟拜偶像之非。卽除去家中所供神像。且焚毀店中所儲之香燭冥洋等。計值十餘金。以此闔市人士。大爲激昂。謗言鼎沸。羣闕至博士書室。欲逐之去。他鄉博士以一人獨居重圍之中。而中心泰然。不作驚駭之態。惟以向人所講之眞理。一一反省己心。因聖神之感。天良之責。時憂己之重罪。無法銷除。定不能遁天誅。因之食不甘味。寐不安枕。嘗中夜起坐。焦思苦慮。天人交戰。心若懸旌。旣思祈禱。以望救。又



欲姑息以待老。一夕將三鼓時。輾轉反側。臥不安席。宛若死亡。卽在目前。坐待刑罰而已。中心實覺無法。乃燃燈起坐。對影相憐。撫髀自慨。曰。已矣乎。悟已往之不諫。知來者之可追。遂捨棄情欲。中一切所嗜好者。來就耶穌。志計已定。屈膝認罪祈禱。但心中仍戚戚如前。焦灼萬狀。渴望上帝垂憐。翌日早起祈禱後。心仍未得慰安。因覺一己聞道已久。亦頗明綱要。尙強項不服。陷此明知故犯之愆。恐上帝不之宥也。正沉吟間。忽聞有聲如在其上。亦如在其旁。語曰。上主已聽汝之禱。赦汝之罪。於是君感激涕零。不特前憂盡去。且覺無上之喜樂。充溢於心。深感上帝之鴻慈不止。時乙丑年六月中也。博士覺受上帝之恩召。一如保羅所云。我自生時。上帝已定旨召我也。博士自言上帝之召。已有二事可證。蓋年九歲時。有同學某氏子。與之莫逆。偶沾腹痛微疾。數日而沒。彼時博士扼腕咨嗟。如癡如醉者數月。雖悼其死。實則自悲人生之不久也。以後歷年聞人之死亡。輒殷憂不已。至此獲聆聖教。知將來之禍福。觸動舊懷。直至無可奈何。始生悔改之心。此一證也。博士幼日閱玉歷抄傳。觸目警心。遂奉爲圭臬。以期寡過。無忝所

生匪但此也。卽凡勸善之書。無不案置篋藏。珍如金玉。正如浪子離父遠游。盡耗一切。枵腹難堪。卽取豕食之豆莢充飢。至是獲聖經。知真道。譬之登泰山者。小略嶮矣。前日所恃爲安宅者。今則視若漏屋破舟矣。是以不得已而作番遷之想。此二證也。自是之後。晝勤教讀。夕研聖經。教會聞君受化。屢於安息日。派傳道者至博士書館中說教。博士率館童靜坐聽道。如是者半載。學童之父兄大恨。謗毀備至。君不爲動。次年春。薛教師來鄉。爲博士行洗禮。時年二十有四也。里人聞博士奉教。不出祀廟之釐金。輒合衆羣攻之。每屆上元尤甚。聲言奪博士之產。逐之出鄉。且迫使納一鄉之田賦。雖家人亦附和彼衆。而夫人之阻迫尤力。博士處此困難甚矣。然仍急切祈禱。倚上主之能力。下氣柔聲。善於排解。卒使鄉人相安於無事。家人先後受洗。今里中信道者數十家。可百餘人。皆博士爲之先導也。博士旣領洗。益以證主之道爲樂事。逢人卽告。言必詳盡。旋隨薛教師往各村宣道。教會授以勸士證書。美以美會定章。勸友之才德。可任勸講者。教會卽予以勸士證書。得隨時講道。惟仍自營生計。非正式之受俸傳道員也。然此職之重要。博士猶未明悉。亦未以傳道爲己之專責。迨奉派至

閩清縣新開教堂中一載。離羣索處。靜居無聊。必出外宣道。其心始快。因漸覺上帝特召。已以任傳道之責。願以全身奉獻於救主焉。丁卯年冬。調至福州城中。主持東街福音堂事務。歷任三年。每日開堂宣揚福音。因更覺傳道職任之高貴。義務之重要。而才能知識。殊患不足。勝任。以此心中誘惑乘之。謂不如且理他業。時有族伯父病危。博士訪之。勸以信奉耶穌。伯以世事之擾。不果。越數日。遽謝世。博士爲之懷憂。臥不安席。寤寐間如見救主之顯現。因悟基督降生之奧義。心又因之大樂。一千八百六十六年秋。調至福清主持循環事務。美以美會稱教會一區曰循環。凡三年。曾撰宣道日規約。約束本循環內傳道同人。條理井然。一千八百六十九年。年三十二。受金斯理會督按立爲執事。美以美會之副牧。隨按立爲長老。美以美會之正牧。遂主理連環事宜。美以美會數教會合爲一大區稱曰連環。辦事多歷艱辛。才幹亦因磨礪而益穩健。昔聖保羅歷數己之所遭。迭記試誘危難之條件。博士自述傳道時所逢之艱險。祇較保羅少一二條而已。其中尤以僞兄弟之危險。更爲可憂。當博士主持福清連環時。會中一傳道者。任事已三四年。博士以事停其職。勸以別謀生計。其

人大恚。誓有以報。嘗懷利刃。乘醉入禮拜堂中。故意訕鬧。欲激博士之怒。因手刃焉。如是者五六次。他人無有知其隱衷者。博士亦未知也。第每見其至。輒和顏悅色待之。如常。其人胸中盤旋。不忍下手。旣而語友曰。余屢欲死之。然因其和容相待。又烏能下手。曠。詎不危哉。其人擾博士者時互二年。博士未嘗一日爲所勝也。其人後卒悔悟。負荆請罪。博士之以善勝惡。誠足令人欽慕不置也。在福清之日。受艱辛最多。雖內外交迫。而博士惟恃上帝之在左右。得以安之如素。一千八百七十年。博士決志不復受西國教會之俸給。專藉教友捐輸以度生。當教會初創之日。此舉之困難可知。然博士毅然創之。亦惟賴上帝之洪恩耳。其後陳美愛、李齊美、林振珍、許揚美、諸牧者相繼步武。實爲後來教會自養之先聲。然福清一區。教友財力綦弱。捐輸菲薄。博士緣此備嘗辛苦。曾作向教友陳情小啟。詳述苦況。詞甚悱惻。而其內心之奮鬪。更爲困難。一日值第二季會之時。美以美會例每教會每季一會曰季會。例當出行。顧天久雨不止。博士心殊煩悶。夜臥朦朧中。如聞人語云。汝操心焦勞如是。然人苟無靈魂。則亦徒然耳。博士聞之大驚。披衣起坐。

燃燈喚醒同居之某傳道。詢以曾作何語。其人愕然曰。某方酣眠。又何嘗出一言。博士自思此言果係真實。則己之一生勞苦。俱屬無謂。不如回鄉別圖他業之爲愈也。正躊躇間。蹀躞室中不已。忽目前如見十字架顯現。心大醒悟。前言蓋出於邪魔之計誘。苟人無靈魂。則基督在十架舍生。又何爲哉。按主之甘心受難。無非欲救人之靈魂而已。自此心復平安。斥絕撒但之狡謀。終身倚賴救主。作其忠僕云。是年所收捐款。合米薪日用計之。不足八口之家三月所需。然博士祇有一子。故猶可支持。至年會時。有他連環之信士。憫博士之貧乏。特指數金爲贈。適足贖回已質之衣服。此皆在福清連環事也。一千八百七十一年。調至福州主理天安堂事務。繼司福州連環。雖不如前日之缺乏。然捐款所入。仍不足以供贍養。博士惟堅心耐苦。從不爲人道之。而同爲傳道者。或疑博士陰得西教士之資助。故能處貧不窘。當年會之際。竟在衆人之前揚言之。博士不得已。乃向同人剖白心迹。言數年以來。未資西友一文之助。同人乃大欽服。一千八百七十四年。奉派主理興化連環事務。其地教會新闢。信士不多。聞者咸爲博士憂。或

勸勿移眷屬至彼。博士決意全身倚賴救主。衣食不縈於心。悉聽會友之題捐。卒移家而去。至則會吏美以美會每教會司捐之信士曰會吏已備半月之糧。博士學士音七日。卽出外巡視教會。諸傳道者與會友。知博士不支西來公款。捐輸益爲踴躍。日用因此粗給。是年十月間。在福州臥疾甚危。西友延醫診治。天安堂教友日夜輪流侍奉。病已書日記曰。父乎。尙祈助我餘生。勿虛度韶光。以副我父保我微軀之至意也。次年八月。在興化日記有曰。夜間余說經感動多人。最可感謝上主之恩者。卽陳久賜一人。因鬱致病。噎食翻胃。身體羸甚。是夜說經畢。見彼由堂踴躍而前。大聲呼曰。感謝上主洪恩。今夕余之病愈矣。因述所聽之言。勝於良藥。會衆見其面容紅潤。又能如常飲食。與健者無異。因同聲頌謝。稱爲神蹟。傳道者二十餘人。與余皆喜不自勝。以天恩超於常見之上也。博士居興化五年。教會與身家之光景。均日進一日。一千八百七十九年九月。調主福州連環兼理真神堂循環事務。其明年。美以美公會擬立英華書院。以教子弟。博士與中西同志。力主其謀。受毀言而不辭。書院成立後。人材輩出。後人論其初功。無不佩博士之遠

識。是歲。博士以一身而兼督福音英華培元三書院。其後又兼督女學校。男女學子受其薰陶者。數甚衆焉。庚辰辛巳間。二弟先後謝世。博士恐父之過於傷悲。每三五日。輒自省垣歸蓮花峯。故廬承歡。在福州三年。至一千八百八十三年秋。自請主理延平連環事務。因此乃新區域。爲博士足跡所未至也。年會允之。延平在閩省諸郡中。遭兵禍最烈。居民無子遺者。今居彼者皆非土著。五方雜處。風俗强悍。地既貧瘠。信徒共祇百餘人。故無力自養其牧師。博士巡行一週。可數百里。道路困頓。體力自此轉弱矣。初至延平時。嘗爲拳匪所攻。拳棒交加。曳至府署。受種種陵虐。一晝夜後始釋。其後太守上詳。謂博士乃狂人。擾亂治安。博士受此迫害。怡然爲主而樂。其體自此益疲矣。然仍屢作旅行。常步行度山越嶺。不以跋涉爲苦焉。首夏出行。因耕茶二工正忙。不能得挑夫。往往自負行李。嘗乘舟過灘。攔於中流。舟之首尾觸石。幾破。又無小艇來援。幸一時水漲。舟子持篙鼓權。漸移深處。得免沉溺。山行舟居之時。運思不輟。或自撰讚歌。或籌畫教會事務。山野鄙陋。客店湫隘。難以棲身。博士每宿其中。未嘗不切望祖國之社會。得

以早日革新也。教友既貧。供張甚薄。菜肴或至不可下咽。而博士仍甘之。曾在延平東鄉會友張姓家。爲一學道之婦施洗禮畢。午餐祇菜湯一味。博士感其意而憐其貧。爲之欣然舉箸焉。博士在延平四年。道大行。府城有巨棍。人稱之曰通城虎。自信道受感後。舊態盡革。邑人無不嗟異。謂非眞道之靈應不至此。府屬有沙縣者。教堂設於縣署內。署中亦有信道者。乳母亦歸主焉。但他縣則不能如是得手。博士日記曰。光緒十三年正月間出巡。四月初八日。擬往順昌道出洋口。遇和教士。聞或人問和君曰。信徒亦爭毆否。和君引聖經之言答之。人批汝右頰。則轉左頰向之。人訟汝欲得汝裏衣。則外服亦聽其取之。余旋別去。至順昌。夜間領禮拜。適又讀及此節聖經。初十日因本城甲首不願賣屋於教會。以丈尺不合爲詞。已訟之於官。待余至。卽傳余入署。問所買之屋。願退還否。余答以不能自主。官命余明日勿外出。以待蒞勘丈量。余唯唯。次日下午。官蒞丈量與契據合。無可訾議。乃陰唆民人。以買地建洋樓阻礙風水。亂民彙聚。毀教堂之門窗什物。拖余毒毆。又強挈入署。閉署中差役房內。余徧身痛楚。舉目無助。將暮。信



士二人入署探訪。余囑以速回堂內。取舊履襪。以免跣足入內衙。既納履。強進門房。請官驗傷。一更將盡。官飭吏驗報無傷。余獨坐悲悶。中心不平。以爲我國官吏。何無良至。是彼時外饑渴而內傷悲。蹙頰擧眉。正無以自慰。時目前如見白紙一條。闊二寸許。上有字二行。余讀之。則爲人批汝頰。則轉左頰向之云云。余已知下文之語。故不再讀。卽時定神開目。惟見燈光帳影而已。乃恍然悟曰。上主乎。洋口堂中蒙主託汝僕和若瑟君。宣布此言。夜間禮拜時。又逢此節經文。予何以忘之。致內心不安如是。於是滿心安恬。轉悲爲樂矣。讀此可想見當日傳道之艱辛。與博士之信心也。博士雖在延平。而福州教會要事。仍倚重之。每於出巡之餘。上省垣考試三書院學生。或助武林吉先生譯書。亦可見其賢勞也。一千八百八十六年。年會公推博士爲赴美國總會議之中國代表。次年正月起行。既至美。見美人虐待華工。有違正理。新訂約章。至下逐客之令。博士於會事之餘。得悉此情。悲憤不能自己。因擬上書美政府。請訂良規。美國布道會壯其志。遂其意。爲之先容於美國議院。院中執政者。讀博士之書。爲之動容。語博士曰。此約

業經二國互允矣。奈何。逾日議員某引觀美國總統革利佛蘭氏。博士備陳華工見迫苦況。總統爲之泣然。慰之曰。若貴國未經批准。或尙能再下議院重議。今則無可爲矣。博士一腔忠愛國人之熱忱。固不徒於三十餘年盡心傳道見之也。旋得美國南省某大學贈以理學士 $\text{Ph.D.}$ 學位。北阿省大學復贈以道學博士 $\text{D.D.}$ 學位。是年九月。事畢返國。而博士之父。已於前七日歸道山。博士料理喪事。哀毀盡禮。體愈衰弱。仍監福音書院事。一千八百九十一年。兼理閩省會報筆政。又於天安堂宣道。向大眾則熱忱訓誨。對學生則苦口提撕。數年如一日。至一千八百九十二年。故鄉父老舉博士爲鄉約正。行誼純篤。爲里人所敬服。博士於一千八百九十年熱病之後。加以肺炎。旋失紅。雖旋發旋愈。而元氣固已大傷。因告病退居。然遇人訓誨。仍不稍懈。有友贈以養病資五十金。博士悉舉以充教會中老年傳道之養濟金。一千八百九十三年正月。咯血症發。臥牀不起。病中惟言教會之事。自期病小愈。當以餘力報效天恩。然至二月二十二日。竟以不起。享年五十有九。教會內外知博士者。無不悲悼。美國領事署爲之下半旗以

誌哀。黃乃裳孝廉挽之以聯曰。以儒術闡二約真經。語剛方如彼得。淹博如保羅。吾道中曾獲幾人。計年花甲將週。遽使五洲驚噩耗。其嘉模垂十閩教會。矧繼志有佳兒。傳薪有高弟。天下事夫復何憾。此日玉城應召。定令萬聖迓先生。時人稱爲實錄云。博士善說教。每次講道之後。日記中恒記聽者之效。坐中屢有涕泗交流。痛承己罪者。每至一處講經。則聽者必較他日倍多。泰西士女亦樂聆之。有以講義譯成英文。寄登美國報章者。其勸父信道也。祇用婉言數語曰。父乎。偶像不必敬。上帝宜崇拜。此道乃世界第一真理。父即決心皈主。自後居里中傳道若干年。博士善治事。每至一處。必明訂章程。人已共守之。如在興化。則定婚姻、訪病、送死、弔唁、送葬、追遠、諸項章程。鄉塾章程十七條。循環內傳道員日記格式等。在福清則定宣道日規等。著信道十要小冊。好屬文。簡明暢達。每次年會連環會季會之後。必有記錄。登之教會報。屢有著述。關世俗之迷罔。刊之上海教會新報。林樂知博士主筆。即萬國公報之前身。福州閩省會報。當年教會常有徵文闡經之舉。博士以傳道餘暇。應徵輒居前列。赴美時。著有使西日記一書。又嗜吟咏。感恩懷

遇之念。俱發之於詩。信手拈來。能明心曲。仿邵康節之體。時與友人唱和。多至數十首。其風雅亦一時牧者之選也。先時博士擬教會自養。患力不濟。次弟亨韜業醫。所入尙豐。性友愛。聞博士有內顧憂。曰。兄爲道奮不顧身。吾當迎嫂與姪贍之。以成兄志。由是博士始得盡心職務。迨教會漸興。捐欸略裕。始挈眷去。後亨韜病亟。博士正出巡。速之歸。語博士曰。十餘年來。所習救道。斯際殊覺大有用處。臨沒。囑博士傳道弗懈。卒時僅年三十有四。博士以弟知己之志。故悲傷迥異尋常。博士之子天錫學於美國。學成而病沒。天保習醫。有聲於時。天貽任譯員。女某亦習醫於美國。

教史氏曰。耶穌教會之美。以美宗。以一千八百四十七年入福州區域。宣傳十年。而得一人信道。此後三十年間。正爲博士宣勞時代。其教會開基未久。任事者之辛勞艱難。非今日之信士所能想見。余幼年讀教會新報。見博士之詩文自述。固已欽佩其爲人。後遇其令嗣天錫天貽。因得讀博士之日記。哀啟行狀年會錄等。乃撮要以成此傳。惟其自述與行狀之紀年。間有不符者。殊不可解。今按原語存之。不敢改亦正不必改也。

顏永京先生事略

篇二

顏先生名永京，字擁經，福建廈門籍。一千八百三十八年爲清道光十九年，誕生於滬。以父在滬經商，爲木棉行經理，故挈眷寓居小東門。先生行第三，小名曰三大。二兄早歿。先生不啻長兒矣。幼年之事無傳。九齡入美聖公會所設之小學校，校蓋文主教所設者也。先生年雖稚，而於中英文俱知向學。師長器重之，功課之暇，愛嬉戲，常爲諸童率。每效道士身被單被，作鶴氅，手持搖鈴，十餘生從之。塾中有犬斃，則合諸生作殯葬之儀，送犬入土。先生之少時，固無異於他童焉。年十五，與楊君同游美國求學，有德拉瓦州之葛雷門氏，撫之如子弟，居其家二年。楊君歸中國，先生至紐約州，入安桑中學校，以爲入大學之預備。有昇天堂之主日學校，津貼先生日用。該校之牧師曰貝德爾氏，貝氏尋陞俄亥俄州之主教，因挈先生去，入該州甘必耳市之根榮大學，使肄業焉。先生在大學時，所造不亞於美之少年。校中有學生之團體，以希臘字母爲號，必資格較高之學生，始得列名。先生與焉。溜冰泅泳與擊球之戲，俱所擅長。辨論中屢以口才

取勝。合校俱推重焉。學成得學士學位。後數年。該大學又贈以碩士學位。年二十三。乃返祖國。時正太平天國聲勢赫然。又值美國南北戰役。因之教會無款以養教士。先生以報本之故。欲爲教會效力。而一時不克如願。加以家累頗重。非有以調濟之不可。因與文主教商請。先在商界執業數年。再入教會奉職。因就大英領事署譯員之缺。月俸三四百兩。當時英文人材極缺。故也。繼又在漢璧禮商店及工部局爲譯員。當時號稱爲西人通事者。類多市井小人。每不顧品格。夤緣作奸。以此致富者。不乏其人。獨先生潔身自好。不以貨財動其心。知先生者。莫不欽其爲人。工部局執事譚先生之廉正。請訂數年之關約。以期久任。然先生志在奉役於教會。故待教會之事。一有頭緒。旋即棄美缺而學傳道之職。時文主教已去。衛主教繼任。顧先生數年在教會之外任事。其扶掖教會之心。未嘗稍息。嘗捐款補助小學校一所。在虹口之救主堂。盡各種宣道之義務。既受聖品之職。司卽宣道於武昌漢口等處。爲時計十二年之久。當時聖道初傳於中央諸省。人民不省所謂。故宣道之難異常。往往久而無效。先生每有灰心之歎。而仍

奮其志氣。不稍息忽。晚年始見己所植之基礎。漸有功效。心爲之快慰焉。先生以數年營商之故。小有積蓄。其子金粗可自給。故不恃教會脩脯以爲養。遇有可助之事。亦樂爲之。嘗以故假千金於教會。後見教會無力償還。遂毀其券。不復索償焉。又因喉疾不克奉公者一年。教會之俸。辭而不受。同事華人有病。先生之俸。高於尋常者。先生自請損之。以平同事之心。凡諸皆可見先生之度量。聖約翰大學始立。先生爲之師。在校八年。諄諄施教。從之遊者。後多爲教會牧長。校中教授英文。卽先生啓其始。蓋於大學之事。始終盡力。未嘗稍倦云。其後虹口救主堂。請先生爲牧師。先生居堂後住宅。一十二年。迨易簣而後去。本堂職務畢舉之外。凡上海教會之公益事業。莫不爲之提倡。如除鴉片貿易會。勉勵會。聖教書會等。尤多謀畫。蓋各教會共仰之爲領袖矣。以其暇日。著爲書冊。以益後進。先後所成者。如史本守氏即斯賓塞爾之肄業要覽。海文氏之心靈學。漢譯心理學者先。英普教會史。教會禱文。聖公會要道等。凡若干種。又爲少年子弟製訓蒙識字之書二種。華人之自譯西書者。當推先生爲首導。筆路籃縷之功。不可沒也。一千

八百九十四年。英國志士深悟運鴉片入華之非。因公推勸爵伯拉賽氏等一行委員。至印度調查鴉片之害。且招先生至英京倫敦。陳說中國人民歷年所受之禍害。以冀英國人民得聞華士之請求。而定其禁止之決心。先生其時精力已衰。且此行需在通都大邑之間演說。殊非率爾操觚可比。然爲祖國利害起見。毅然應召。不以一己之安適爲意。既至英國。各處俱歡迎之。卽大學校所在之市。向日輿論紛擾。難於措詞者。先生至而演講。衆亦翕然無異辭。是則先生之出言有則。能得人欽佩。亦可見矣。英事既畢。乃渡大西洋而重遊美國。巡行東南二部。演講中國教會之光景。以助美國教會之通曉布道實情。既而返國。仍執牧師之職。一千八百九十八年。爲清光緒戊戌年。德宗方思變法以圖強。囑在京之教士某君代延一教師。以便習學英語。教士素重先生之才學。因至滬上勸先生入京應聘。先生辭之。言其故有三。改革太速。皇帝於此時習英文。未爲得宜。一也。教會事不可舍置。二也。不願入政界。拘於禮規。三也。然先生之體氣。至是亦浸衰。遂於是年謝世。享年六十。易簀之前。與闔家眷屬共受聖餐之禮。卒前一



日神志已昏。不省人事。至友某君低語其耳曰。君宜倚恃上帝。先生之容忽現喜悅。合手微言曰。余深知此意。因此余深感上帝之恩。此蓋其在世之末次語也。出殯之日。追悼之會。海上教會及商界領袖。無不致敬。以爲先生之一生。實有功於社會也。先生性正直。不容人世有不平事。上海租界之內。西人之權偏重。其中不良者。往往陵侮車夫。或下等華人。先生見之。未嘗不義形於色。輒爲之剖解伸訴。西人爲義所屈。乃謝罪焉。租界之市政廳。有西董而無華董。先生亦引爲不平。以爲租界內華人納稅之額。固遠過於西人也。故屢與中西志士謀之。期得華董之參預。事垂成而卒不果。至今猶循舊章。令人益追念先生不置。黃浦之濱。有公園焉。爲一市之勝地。例不准華人入內。先生以爲不合公理。爭之甚力。市政廳卒應其所請。允華人一例可入。既而在蘇州河之旁。另闢公園一區。專爲華人遊息之地。蓋出於先生之力也。先生平日起居有定。操守維嚴。不容人以非禮相干。待人以和。交友有信。國家之事。無日去懷。每談至失敗。輒慷慨見於色。好讀書。積卷帙甚富。當世大問題。無不研究。科學神學。不偏廢。凡有新說起。輒

涉略之。然守正不阿。不以異說搖其志。其於祖國之布道情形。不作狂熱之野心。亦不存悲觀之念。當日有西士某君。著書評教會教士之缺點。先生答之曰。余以爲眞道之在中國。固不得一時大興。然吾人決毋因此而失望。因今日之布道。譬之耕種。止爲墾土之時代耳。播種耘草。尙俟他日。無論收穫矣。然時會必至。將有豐收。與泰西之教會無異焉。若謂教士布道之法有不合。及所收教友絕無上中社會云者。亦非盡然之詞。夫教會初設之地。信道者自以貧寒爲多。昔保羅施教於庇利亞。與帖撒羅尼迦。卽已有此情形。貧寒者固居多數。中等人士次之。紳界男女亦間有之。卽舉上海一隅而論。雖不能稱人文之淵藪。然五百教友之中。已有茂才四人矣。至若教會收納向日犯罪之人。亦因其肯改心向善耳。非嘉其爲惡也。評者不察其實。妄加苛求。故有此等語氣耳。讀此可見先生見識之遠。持論之平。蓋先生之存心公恕。於幼時卽已見之。當其在校之日。同學五六十人。飯時每八人爲一桌。肴饌平分。而各食之。以免強弱陵奪之弊。然無人願任均分之事。因一有不均。易起他生之爭論也。先生倡議八人輪日爲主。主

者既分八簋之後。聽同人取其七。餘一簋爲主者所得。用其言果絕爭端。此事雖小。亦足見其存心之公。見理之正矣。先生男子數人。女子一。俱令肄業美國。幼子惠卿最著。現任駐德公使。

教史氏曰。先生貌白皙。身中材。容有威。語不繁而必有中。余在吳門博習書院肄業時。先生因病來遊蘇。猶不肯自逸。請於院長。每日教書數級。以爲消遣計。余亦受其教。蓋地理志略一書也。因得挹先生之相容柔聲。常在心目間。其後在申見先生於教會公同事業。多所效力。蓋先生固海上教會之領袖。當時牧者能如先生之學貫中西者。尙罕覩其人。而能謙以自牧。其得人之推尊也宜哉。



許揚美先生事略

篇三

許先生名揚美，字執端，又字作舟，福州閩縣洋頭人也。生於道光十八年三月二十三日。即一千八百三十八年。祖父以命卜擇日爲業。父曰彥士，爲軍營末秩，禦土匪有功。性淳樸，爲里中董事。母何氏，兄弟六人，妹二人。先生六歲就外傳，十七歲輟業。父命入從兄酒館中執業。同人狎遊無度，屢誘先生同往。先生知自愛，不肯從。後又入父執之洋藥棧爲佐理。居數月，悶悶不樂，乃還家。棄書史，習繪畫，售藝以佐家用。旋設一畫肆，爲餬口計。年十八，娶妻林氏。先生自幼好寂靜，不愛紛華。茹素念佛，企慕天堂與長生術，求之不已。每念人命淺薄，壽夭無定，死後冥刑等事，中心常若鬱結。聞人言某廟靈爽，卽往朝拜，以冀有所遇。如此者屢，而終無所得。以此忽忽不樂。一日偶坐樓頭，見架上積書累累，因抽一本閱之。見其中有論耶穌者，不知其作何語。再閱愈怒，立扯碎之。猶欲覓一利刃，片片裂之而後快。且不解乃翁何以取此等書積之家中也。時先生之父，已有信主之意，與親友晤談時，輒論偶像之當棄，天主之當奉。先生聞之，益以爲異。

咸豐五六年間。卽一千八百五十六年。先生之長兄播美。從軍平匪。衣錦榮歸。親友道賀。無何。鄉人譁然奔告先生曰。乃兄已入教矣。汝知之乎。今猶在教堂與西人談論。先生聞之大恚。走偵之。信然。走告其母與家人。以兄謾神蔑祖。違棄聖賢之教。憤甚。由此與親友共訕謗不已。一日播美語先生曰。弟性素正直。惟理是遵。今不察道之正僞。徒隨衆人而施狂詈。非弟之素性也。今請與弟辨。如弟之說有理。兄請從之。否則弟須從兄。於是兄弟暢論。各尊所信。乃先生之說。一一爲兄所屈。而兄之所論者。先生思之。又未嘗不中理。但自問祖父相傳之道。如悉皆虛幻。則又不甘輸誠。故終拒之曰。兄自知有罪。則兄自信之。弟無罪。又何必信。因不歡而散。其後父有恙。美國教士麥利和與基順二先生來問疾。爲之祈禱。先生見其向空祈禱。並無香燭。不覺失笑。越日。兄播美責以無禮。且言前日弟所言既屈。明日安息。宜與我同往堂中禮拜。以符前約。先生自覺詞窮。姑許之。是夕對平日所奉之白藝觀音像。焚香切禱曰。弟子與兄辨道屢屈。約定屈者當從勝者之道。今令我踐約。無法可辭。如一拜上帝。則諸神佛俱當棄絕。神果

有靈。乞卽顯聖。及時報其侮慢之罪。以助我。不然。弟子亦未如之何矣。徹夜求籙。未見影響。次日。不得已偕兄往真神堂禮拜。途中垂首不敢仰視。懼遇相識。嗔笑。疾趨入堂。隨衆坐立行禮。細味所講之道。殊有至理。自謂崇拜天地主宰。固爲正當。向日出言逾度。今日反悔。有何面目見人。蓋先生信仰之心。卽起於是。越二禮拜。合家團聚。先生之父與兄論道。因問家人俱已信從否。又問先生決志與否。先生諾之。於是全家歡樂。同行禮拜。恭誦上帝十誡。使徒信經。先生遂建一樓廳。爲一家早晚祈禱之所。焚棄偶像符籙。但留白瓷觀音像。後贈與麥利和教師。肆中存有所繪仙佛像一百八九十紙。意欲攜至市上速售。以後決不復繪。步至市中萬壽橋。心忽自責。謂汝知拜偶像爲干天律。何又使人拜乎。因一一擲棄橋下。逐流而去。時觀者伸手來奪。言旣拋擲。何不給我。或以先生爲病狂者。先生因借此爲題。對衆宣揚聖道焉。次日適安息。先生蚤起盥沐。往聖堂恭行禮拜。惟聖道奧旨。尙多未曉。惟心知上帝爲真神。認耶穌爲救主。殊樂於敬拜耳。自此心中漸有膽識。能辨析真僞邪正。晝夜思道。其樂無窮。益覺向日之蒙昧。

爲可恥矣。一已明道之後。更喜與人論道。每遇親友。輒以真理勸之。但邪念時萌於心中。惟恃祈禱消除之。愛習聖經之道。偶有會意。則欣喜不置。家距倉前山麥先生之居約十里許。然乘間卽往請益。麥先生語之曰。讀經有所不明。當跪求聖靈啟示。先生歸如其教行之。每日在肆。手搗顏料。而目閱聖經。心思其意。朋友會集。亦互爲剖晰。主日聽道。益樂牧者之有所闡發。故悟道之樂。與日俱長。手舞足蹈。不自知其所至焉。未幾先生心境中經一重之艱難。卽自恃己力。而忘上主之神能。使人成聖也。先生嘗自述曰。一余心自喜。蒙天父之恩。拯出迷途。必宜成完潔之人。盡心守誠。方可惜爾時未覺自恃之念。已隱伏心中。雖口稱宜賴聖神。而心中則以爲自力足以守誠。若此者。皆因昔日棄邪歸正。頗爲易。故未曉歸功於聖神也。故雖熱衷勸人。斥異端。折浮辨。見人屈服。卽以爲喜。而乏溫良慈愛之心。卽因不悟己短。故不能體人之難也。自願力遂十誠。盡心事奉上帝。愛人如己。然覺其難。無力足以成之。又時有先吾信道者。激我使不能忍。於是外生攻擊。內萌惡念。強不可遏。時有非禮之思。慮言動。黏著吾身。欲去不能。



浮言貪念。日有所犯。縱竭力拒之。而仍不能克。戰慄呼救。猶不能勝。惟跪禱時。始覺漸靜。然隱微之中。此罪未去。彼已復來。心思之內。宛如別有一人。進種種之誘惑。發誘瀆上帝之語。其聲可憎。其語難聞。內衷紛擾。乃無已時。故驚愁憂危之念。不絕於懷。遏慾而慾反盛。守誠而誠愈違。每夕自省。見己之悔尤叢集。明日必當加意持守。次晨未起之先。定意本日於語默動止。宜如何小心。以合天例。主意決定。乃起讀經祈禱。而後操作。至夜自省。則不禁浩然長歎。蓋本日所遇之誘惑。較之往日。又不同也。以此悟百體之中。皆爲上帝之敵。思力守主誠。而干犯綦多。中心慚憤。無地自容。又念旣沐神恩。得基督之贖罪。而猶躬蹈罪中。蓋當時信賴稱義之道不明。惟恃守法以冀成聖。故憂懼之情日益增加。馴至廢寢忘食。形容枯槁。雖迫切籲懇。而憂心終不得慰。讀之可見先生所歷之境。與古之使徒保羅。近世之本人約翰。正復無異。蓋守禮與恃恩。塗徑絕異故也。咸豐十年正月二十日。先生之父棄養。教士基順與賓爲霖二君。見先生憂形於色。以爲居喪之故。不知先生心中憂罪更甚於悲逝也。此中鬱結。欲言無從。惟憶父

彌留之時。見其一手按胸。示平安喜樂之狀。一手指天。示將歸天國之意。故憂悶之中。猶可小慰。以爲父已上昇天父之前。而已亦將至彼同聚也。但內心善惡交戰之苦。久而不止。無以自解。一日安息。先生獨居真神堂東廂。倚牀思道。傷心垂涕。祈禱曰。主耶穌。吾將死矣。其速來援我。我最有罪。主若不引手救援。誰能拯我出惡哉。舉世惟主爲救主。何任我哭泣籲救耶。正祈禱間。倏聞有聲入其右耳。詔之曰。小子。安乃心。爾罪赦矣。何不信乎。先生一聞而知爲救主之聲。乃忻躍拭目四顧。杳無迹象。因跪牀前問曰。主安在。時覺又有無聲之聲入於心曰。我在爾左。亦在爾右。先生之心。因此大受感動。流涕不已。惟謝上帝厚恩。得卸無限重負。自此以後。諸病悉除。在地若天。聖靈充溢。先生之心。思言行。日著敬虔。愛慕天父。如小子之戀父母。其樂不可名狀。先生信道之後。仍業繪畫。基順先生又教以玻璃面繪畫之法。所入益豐。殊可自給。而先生之心。未安。以爲身受神恩。急欲公之於人。如不宣布。則不能安。故往城內市衢。附郭村莊。尋機宣道。夜則與親友暢談。勸信耶穌。人咸奇之。或加謗詈。投以瓦石污穢。先生忍而不校。

人因目之爲狂。嘗勸業塑偶像之林正美。業繪畫之黃求德。一見迫於妻。一見厄於母。先生循循善誘。二人俱先後信主。爲教會器使。又自請於西教士。願在講堂宣道。有三教中人及天主教友。互相駁詰。先生隨口答之。皆能中肯。其後閱書。始知昔所言皆本至理。當時未聞大道。而能出心應口。詎非上帝之靈。有以啟之乎。旣而基順先生見先生傳道頗勤。欲津貼之。先生不受。以爲繪畫所入。足供日用。傳道乃報恩耳。基順先生曰。如子時時出外傳道。不免有曠恆業。如不受教會津貼。則必至缺乏。君如執意不受。吾曹傳道時。亦不敢來邀同伴矣。先生深思之後。毅然答曰。一身不事二主。如先生許吾受俸傳道。則當專務之。基順先生聞而感泣。因應其平日所祈禱也。此後先生舍其舊業。而專務傳道矣。初受教會命。往桐口賃屋。不諧。仍居城中。眞神堂與求德正美諸君。爭先宣講時。賓爲霖先生。亦來居眞神堂之旁。其人滿充聖靈。虔敬無比。先生親炙其訓。研究經義。學益大進。咸豐十年。奉命至牛坑。設堂傳道。其地人民貧而無教。戶外堆糞穢。門內畜牛豕。無插足之地。勤於操作。不暇盥洗。故滿身穢氣。不可嚮邇。先生至。

乃教之清潔。每夕授以聖經讚歌。主日禮拜之後。衆皆耦出傳道。福音之光。因而徧及。先生所至之家。有時病者自愈。人咸稱奇。而反對者益起。巫覡爲之率領。教友多受屈辱。先生惟勸以忍耐而已。教友之信心。因之退步焉。旋調回主持福州城內真神堂。傳道之效亦佳。移駐東街新堂。會城中紳士仇教。嗾民聚衆毀堂。及西教士住宅。先生挈眷避去。家具盡毀。搢紳中有素知先生家族者。事後來請罪。先生亦不之校。堂宇經地方官賠償重建。先生又奉調至長樂縣傳道。曾有驅狐逐鬼之異蹟。蓋自咸豐九年。至光緒十五年。計先後三十年間。先生皆任教會傳道之職。同治八年受按立爲執事長。老歷年奉年會議派調在福州閩清福清古城延平興化等處。主理循環連環事務。徧嘗跋涉之苦。先生每至一處。必內安會友。外睦士紳。一意和平。不願倚西教士之助。假有司之力。在閩清之日。教堂適在黃劉二大姓之間。二姓有積隙。不通婚媾。先生宣道時。勸之輯睦。竟得復和。地有匪人。常以詭計毒害教會。嘗以姜黃染字紙。散於教堂四周。揚言教會中人。以字紙拭穢。因激起本處人士之怒。就堂責問。先生歎之有禮。婉言

譬解其人怒釋。以後不復爲梗。市中有匪人劉長倫者。爲博場烟寮之主人。無惡不作。父兄不能禁。乃潛來堂門。竊聽眞道。先生強之入堂。勸以眞道。其人深覺已罪。不敢以爲可赦。先生爲之解明福音大旨。乃大喜過望。歸而息其舊業。肩挑營生。改行成善人。且傳道不倦。人咸稱異焉。居閩清之日。時往延平府屬巡視教會。山行崎嶇。且多盜賊。時遇風雨。不及宿舍。饑寒之苦。不可勝述。先生俱備嘗之。如福清則有械鬪追賦之累。興化則有黑白族黨之兇殺。江西客民之強霸。爲教友者常遇橫逆。先生惟與同志信徒。長祈天父。以免種種危禍。且在古田福清各若干年。俱因教會漸興。經營建立新堂。甫成。而先生輒量移。時人稱先生恒爲人之所難云。先生祈禱之誠。超於常人。初至福清。司連環事務。有下僉傳道者陳君家聲。來請先生速往該地。因海濱有商船攔淺。居民陋俗。卽肆劫掠。商人訴於有司。調兵來鄉清查。吏役因而作姦。誣索善類。有本處傳道美以美會教友義務傳道者曰本處傳道陳開國者。亦遭株連。聞官兵卽來圍抄其家。其家憂急異常。故求先生設法。先生聞之。殊無法可施。因坐而默禱曰。父乎。將何辭以答來人。心中當時

忽得一意曰。與憂者同憂。次日遂偕往。信徒送行者。或告先生曰。此須大聲戰而勝之。聲微人不聞也。先生顧而答之曰。善戰之法如何。我早諳之矣。無勞遠慮也。且歸讀以弗所書六章可也。蓋會友皆望先生用勢力以敵之。將至其地。會友出迎曰。望先生來。如大旱之望雨矣。既入小憩。陳家聲將辭去。先生問以見邀何事。曰。某等之意。先生早知之矣。家有大難。乞先生援我耳。先生聞而憂之。以其恃人力過於天父也。因告之曰。汝曹知我來意乎。我蒙上帝指示。來與汝曹同患難耳。陳君聞言失色。若絕望者。先生更語之曰。雖與汝曹同苦。然亦有助於汝。因汝忙亂之時。易陷魔誘也。我來使汝無過行於汝足矣。陳君強應曰。然。但官兵來。不知何以處之。乞先生一借箸也。言已泣下。先生曰。欲我爲此耶。我蒙上帝召二十餘年。所知者傳福音而已。他非所諳也。無已。則有吾父在彼爲大將。且秉大權。苟相助於官兵乎。何有。惜汝不早言。當爲汝請之也。衆相視愕然。曰。先生尊人爲武員。則嘗聞之矣。然卽世已久。何云爾。豈尙存耶。先生見其不悟。又謂之曰。不第此也。卽發一言。海與風皆順之。不觀夫天地萬物。皆其言所成乎。且

已服其敵於足下。我所言之父。卽上帝也。汝識之乎。衆莞爾曰。唯唯。先生厲聲呵之曰。汝曹之信何在乎。居則曰天父無不知。無不在。無不能。無不理。天上地下諸權皆屬之。今遭危難。反不恃主而恃人。何自欺若此耶。我知汝信道十餘年。而不長進者。坐是耳。汝得毋以上帝爲遠汝乎。上帝實未遠汝。第汝溺於世。爲罪所隔。故瞽而不見耳。幸上帝洪慈恒忍。念救主流血之故。不卽怒汝。今賴其恩。將使汝轉危爲安。俾知上帝恒借其子女。固未嘗遠也。我爲主僕。今蒞汝中。汝當速悔已惡。承已罪。勿有所隱。我則先爲汝求赦。卽汝所驚慮者。或亦得免。未可知也。陳乃流涕承罪曰。我不祈禱久矣。尙有數事。皆一一自承。先生曰。猶有之乎。答曰。無矣。遂偕衆跪禱。當時先生心中得上帝之明示。三語曰。其罪赦矣。家產無損。官兵何爲。此前二言固明瞭。而末一語猶未清楚。謂官兵必至乎。或雖至無害乎。抑竟不來乎。先生起。卽以所得之示語告諸衆。且曰。上帝已聽其僕之求拯諸曹矣。汝宜感恩。且安心操作可也。已而有自海濱來者。曰。其速遷移。官兵至矣。於是陳君等又語先生曰。事已至此。奈何。先生曰。汝何猶懼耶。我非姑爲慰。

藉上帝已明示我矣。汝乃弗信歟。我若誑汝。是爲先知也。所傳之道。何能使汝信從乎。我且留此。至下星期一。待上帝之旨。成於汝曹之中。而後去。陳君曰。有是哉。余以先生姑作慰詞。一似數年前傳道之慰東營教友者。使之勿懼勿避。後爲官兵所拘。備嘗慘苦。今先生既得上帝明示。我儕可安然遵守矣。忻然而去。夜爲親友所搖。復來請先生謁官。先生諷諭再三。始退。已夜深矣。先生自思如此。番有誤。則使此輩信心全失。因決意終夜祈禱上帝。乃一下跪。而上帝之明示仍現於先生之心。謂不論何求。我必爲汝成之。晝間所許。不少移也。先生得示喜甚。乃鳴謝而就寢。清晨。陳君復至叩門。曰。先生未起耶。官兵之來也信矣。頃又有人走告也。先生連聲答之曰。否否。因以所得上主之示告之。且囑其堅信勿搖。旋有其戚屬來。迫使遷避。陳君又來擾先生。如是者三。且曰。我姑遷所有以避之。何如。先生曰。我告汝者。至矣盡矣。汝必欲遷。則汝之事也。我何與焉。我未奉命於上帝也。其三弟某曰。我決意遵守上帝託先生所傳之命。定不遷避。卽爲兵所掠。亦甘心矣。先生問餘人曰。汝曹俱同心乎。答曰。同心。先生曰。善哉。事已了。可




安然操作矣。至是衆皆忻慰。鄰村之扶老攜幼而逃者。相屬於道也。先生憫之。默爲祈禱。心信其必皆得免。每夜集衆祈禱。一夕禱畢。問衆曰。汝曹所驚懼者安在哉。衆皆愧悔曰。我儕實寡信。其罪重矣。感謝上帝。尙肯恩赦。足見上帝深仁厚德。授我儕以堅信之機也。先生居彼。迨官兵撤回郡城乃返。先生祈禱勝禱之譽。因爲信徒所共知。每遇擾害。卽懇先生代求。而先生亦樂爲諸遭艱之信士。籲呼上主也。光緒十年。先生年漸高。體寢衰弱。教會念其垂老。不復調使出外。惟居福州。在病院傳道。兼理天安堂循環。光緒十五年。年會請先生退爲老年傳道。次年新居告成。居家二年餘乃卒。時光緒十九年五月十七日也。享年五十有六。卽世前一夕。謝君錫恩來訪病。先生尙以心中乏樂爲問。豈所謂德愈高而心愈虛者耶。謝君答之曰。某嘗聞諸武林吉先生矣。其在天安堂訓衆曰。爾宜全信全賴全獻。蓋我主之功。足使爾獲勝有餘也。君亦全信全賴全獻而已。奚乏焉。先生聞之樂甚。手作按曲狀。口吟哈哩嚨囉榮耀歸主。聲甚微。衆和之。卒章。乃伏禱起。先生覺樂愈增加。中心快慰。翌晨語家人。爾曹世守上主之道。則眞吾

之兒孫也。言訖。又歡愉不已。近午。醫至。知將屬纊。急召薛教士承恩。時先生口已噤。但指示取紙筆。意欲作字奉之。手顫不能成字。家人違其前屬。頌詩二章以送。祈禱訖。先生之面光榮煥射。儼如天使。適薛教士至。見之。曰。美哉美哉。先生猶以笑容相向。俄舉目伸手。如有所援。垂手而目瞑矣。嗚呼。先生因勞致瘵。十三年。當病苦時。喘息不屬。親友來候。率諄諄以真道相慰勉。見有剛愎弗悛者。則垂淚代禱。至形夢寐。其愛人也深矣。平日持己嚴正。待人有禮。治家嚴肅。內外整然。聖教初傳至閩。士大夫斥爲邪說。目爲異端。而見先生之德品。無不自愧而樂受其教也。美國金山小石大學。嘉先生之爲人。嘗於光緒十三年間。寄贈先生以碩士學位。亦足見先生得人心之深矣。男子二人。則翰則培。女子數人。金安業醫。主理教會之女醫院。

教史氏曰。余讀本人約翰之懺悔記。見其信道後所歷之心境。使人驚異。旣脫大疑大難。後半世遂爲有力之宣道師。今觀許先生之所遭。與本人有相似者。則其傳道之有能力。亦固其所。祈上帝而得指示。其事甚怪。人或疑之。不知人心上通天心。固宇宙間。

之至理。吾人自己未達此耳。非所語於心靈堅誠之信士也。余得交令嗣則翰示余以先生自著信效錄一冊。因掇其大略著於篇。

名  
教  
遺  
徵  
篇  
三



席子直先生事略

篇四

席先生名子直。後改名勝。廩山西平陽府臨汾縣人也。世居西張村。在郡西四十里。祖遺田產頗富。父有孝行。業農兼知醫。性儉樸。好施濟。一鄉稱爲善士。生五子。子直行五。四兄俱讀書有科名。子直自幼有異姿。每日自思功名富貴。終必撒手歸空。究與人何益。故當羣兒嬉戲時。獨靜坐默思。或遨遊山水間。見廟中所塑鬼神之像。不覺悚懼。益增其身後之念。年漸長。父使從名師遊。咸豐元年入泮。娶妻楊氏。夫婦相得。其後父母先後下世。兄弟五人各自分炊。先生秉性剛直。遇事敢言。鄉里敬之。嘗以計解散。霸持市集之士豪。遠近以此重之。凡有冤抑者。輒赴訴焉。先生按理之曲直。爲之剖解。辨白無不滿意而去。妻楊氏早卒。未遺子息。先生以此悶悶。重觸少時身後之念。因思儒經既不論死後之事。姑參釋道二氏之說。以冀有得。乃取二氏之經典。潛心披閱。久之仍無所悟。心益茫然。斷絃十年。乃續娶李氏。又病卒。再娶梁氏。始偕老焉。山西農家。本藝五穀。山間偶產藥材而已。乃咸豐年間。漸有種罌粟者。久而益盛。四民盡染烟癖。民生

日益憔悴。先生自研究脩煉以後。體氣漸衰。精神亦頹。友人勸以吸煙。初不允。後因體益衰弱。乃從之。自此爲黑籍中人。體固不振。而家計日落。嘗行醫經商。俱無所成。病且日甚。一日昏沉將絕。家人以爲必死。已具棺衾。乃先生昏迷之中。似有大聲呼之曰。速回速回。未幾果甦。此後病勢日減。得復其初。光緒二年直魯豫秦晉五省大旱。田禾不生。民苦乏食。其後五年迭旱。居人無以爲生。而晉省尤甚。以其山地多而距海遠。四方以高山爲域。故也。草根樹皮俱盡。人且相食。所至見餓殍橫道。數百里不見烟火。悲慘之象。鐵石含悲。南省善士募款賑濟。教會中人亦竭力相助。山西地居窳遠。外省知者不多。光緒三年有內地會教士德治安林惠生二君。親往晉省查勘。知災況實重。因將情形詳記中外報章。捐款以之漸集。當二君在晉之日。曾過平陽府小駐。分送書冊。居人初見西士。無不驚異。互相傳說。卽先生居西張村。亦得傳聞之語。謂西士別傳一教。其道異於三教。然先生亦不注意。以爲奇談而已。光緒四年。教士李修善。德治安二君。擬久住平陽府。施賑傳道。先生聞之。益以爲異。謂省中巡撫旣許西教士居省垣。何得

又准之往各處宣教。一時士紳議論益起。俱疑西士蓄有陰謀。欲收買人心。深願攻而逐之。而官府奉上憲之命。正力爲保護。故無能爲。李德二君先借居郡中鐵佛寺。設局賑飢。查戶給票。規例整齊。人民沾其實惠。其後賃屋設局施醫。兼散勸世書冊。平陽有宋某者。經商好善。偶得馬太福音一卷。閱之有感。因從李脩善君學道。開齋皈主。助李君傳宣福音。時山西得雨。田地可種。民心漸定。李脩善與李提摩太博士。同謀分書傳道之舉。李君居平陽。博士居太原。值三載大比。士子集省垣者六七千人。二君備教會書籍多分。每分一包。在貢院門外分贈考生。人各一分。包內有徵文小啓。設題六。一曰眞道根源。二曰正心。三曰祈禱。四曰賞善罰惡。五曰偶像。六曰鴉片。於限期內作文寄太原李提摩太或平陽李修善。逐篇評閱。首取四名。得獎銀三十兩。二十兩。十五兩。十兩。有差。西張村應試者。得書與啓。示之先生。同人議論不一。或曰西人此中有計。或曰姑得其獎。何害。先生之兄語先生曰。弟善作文。平日考試恒居前列。今何不作一篇鴉片論。蓋謂之也。先生初意以爲正心之道。何在鴉片。無法能戒。祈禱試之無效。此文不

易作。轉念家計日微。得此獎金。亦可小補。因取包中之書。盡閱之作論四首寄之。及揭曉。先生之三篇皆居前列。西張村之人。聞之稱異。然先生是時嫌惡西士之心正烈。不願與之交接。後倩內兄梁某。伴至郡中。梁君獨訪李君。代領獎款。而先生不入其門。李君詢知先生不來。不願付資。於是先生不得不面謁矣。初入門時。心甚兢兢。惟恐遇有怪物。乃開門迎接者爲宋某。言色甚和。李君出談。更徵道貌儼然。一望而知爲善士。寒暄之後。獎銀如數交付。先生歸而語家人親友。以爲西士可親。不如前所猜疑。其後李擬延先生爲西席。倩宋君來鄉訪先生。道達其意。先生頗首肯。而外舅與家人悉阻止之。李君曰。親戚既不相信。則緩之可也。旣而家人許先生試教十日。以定吉凶。先生上郡。寓李君處授書。見李君言行誠篤。度量寬宏。真乃君子。心益欽服。十日旣滿。還西張村。告家人以近況。夫人猶搜先生之衣。恐其中挾有迷藥也。旣見無他異。而聞先生稱道李君之言。悉其爲人之善。因遂安心。許先生再來郡中授書矣。李君所讀者爲聖經。先生初視之淺薄無味。久之漸覺有理。頓起愛讀之念。日夕研究。終乃知耶穌降世捨



生贖罪之大道。於是又激發其早年企求長生之觀念。自覺已罪。不禁淚下。李君又勸以戒烟。婉語先生曰。君爲儒家子。世代書香。今染此癖。辱沒家風多矣。先生聞之。胸中宛如刀刺。俯仰愧怍。無以自容。卽入臥室。展聖經於前。長跪地上。在上帝之前。痛陳己罪。求主恩赦。且祈且讀聖經。閱至『信彼愛我。爲我捐軀之神子。』一語。恍然大悟。心目之翳。倏已掃除。知耶穌之救贖。施恩於己。以前愆尤。一齊銷除。先生至是樂不可言。甘心降服耶穌。奉之爲主人。立意報答。卽粉身碎軀。亦所不惜矣。改心之後。親李教士如昆季。決意戒除烟癖。多年舊癮。去之自非易事。廢寢食者七晝夜。徧身奇痛。非筆舌所能描畫。先生惟念耶穌在野。受惡魔試煉。終能得勝。故望耶穌錫以能力。亦克驅此煙魔。閱新約聖經曰。『我將求父。父將更以賜汝曹保惠師。卽真理之靈。』先生讀此。一心希望此無所不能之聖靈。降而拯援。可離惡魔之轄制。正懇切祈禱時。覺周身汗出如漿。精神因而充足。蓋上帝准其所求。而烟癮絕矣。先生旣沐神恩。滿充聖靈。卽願在衆前明承上帝。受禮進教。因託宋某向李教士道達其意。李教士初不敢許。恐其進

銳退速也。先生力陳一己立志之堅決。言詞痛切。李教士因許之。施禮爲教友焉。先生一日讀聖經。至五旬節。使徒滿受聖靈。具大能力。中心企慕。亦得此賜。以傳救道於萬人。未幾回鄉。以改心之事。詳語親友家人。無不異之。以爲受洋人之迷。然見其肌態充盈。舉止溫和。烟癮已除。較前宛如兩人。則亦互相暗慰矣。先生取家中供奉之神像。付之一炬。妻母與夫人見之。不禁痛詈。先生好言慰勸之。而後已。李教士本駐漢口。今因晉省賑務已竣。故回漢上。先生送之。依依不捨。歸家頗覺淒涼。轉念本城之人。染烟癖者甚衆。已爲先覺。分當救濟。成此大事。必勝惡魔。方可。故自號曰勝魔。先生自信道後。身壯力強。整理家事。日見興盛。隣里非笑之。戚友疏遠之。先生一不介意。惟盡已分。率家人旦夕禮拜。以冀默化。迎繼母至家奉養之。兄弟早年不睦。先生往而請罪。復和好焉。里人見先生改行。亦俱敬服。有同來家庭禮拜者。夫人梁氏。初雖不信真道。然久聆先生之言。觀先生之行。漸悟此道誠爲真理。甫有起信之念。乃其後爲邪魅附身。廢寢食。發胡言。怪狀百出。每逢家人禮拜。即大呼驚擾。先生患之。村人因又騰謗。謂勝魔今

爲魔所勝。耶穌果不如鬼也。先生念耶穌之言。此類邪魔。非用祈禱禁食。不能驅之。因率家人同心禁食祈禱者三日。乃斥病者曰。我奉耶穌之聖名。命汝出病者之身。不得再來。病者頓甦。卽信服耶穌爲救主。村人和之。乃稱奇不迭。歸榮上主焉。先生因此益壯膽宣教。期以福音徧傳本省焉。郡東楊村有李姓兄弟。在李教士處信道。因受迫害。無進取意。聞先生之名。每主日請至彼處講經。先生允之。相去四十餘里。跋涉不辭。楊村之士人。與先生辨論。先生掬己所身受者爲證。以表聖經所言之不虛。且倚祈禱爲人治病。村中信者漸衆。里黨奉偶像者。因隨時欲加迫害。廟會之時。聲言信教者必治以嚴刑云。於是信道者謀於先生。先生爲之稟官保護。他村亦有受教者。先生往來施教不倦。然其家猶種罌粟。留神位。其後於道益進。始悟其非而盡革之。闔村敬先生之爲人。舉爲村長。先生辭之不獲。乃與村人約。衆必不禮廟神。乃允就職。村人勉強許之。任事三年。一村太平。三年之後。以教會事多。不願再續。時先生家中已成一教會。每安息日來禮拜者。濟濟有衆。先生夫婦供應較周。致所費不資。夫人乃鬻首飾以助教友。

之缺乏。光緒七年。在近處鄧村設一藥肆。後屋作爲禮拜之所。肆中所獲餘利。即爲傳道之用。各處聞先生戒烟之事。爭來求戒。先生酌留於家。爲之進藥代禱。以此名譽益傳於遠近。適隣近之洪洞縣范村有范洪年者。信道之後。設一戒烟局。名天招。先生助之。初用西藥。後因接濟不便。先生乃擬一方。就本藥肆合藥爲丸。服之奇效。先生因之事益繁冗。本縣士紳。久惡先生信教。至是稟諸學院。革先生衣衿。先生申訴學院不理。後從林教士惠生至省垣。見巡撫陳請。始得開復。先生在太原之日。曾遇一少婦。身附邪魔。先生逐去之。迨先生返平陽。魔復來迷。竟死。平陽府屬。基督教既大興。教友散處。不相聯絡。先生與西教士議。每年農工之隙。在府城開會。培養信德。男女教友同聚。得益無限。先生又作合宜之讚歌。使之諷詠。興趣有加焉。自天招局開設之後。成效既著。信徒中有賈利之徒。思藉此爲漁利計。先生痛飭之。來局戒烟者雖多。通年計之。尙有賠累。幸先生二次應教會徵文。得獎金五十兩。始可彌縫。先生見戒烟之人。除烟後無業可爲。因招致其馴良者。來西張村家中。教以操作。屋宇不能容。乃添建焉。有一少年。

戒烟之後。願依先生。先生愛其慧。兒畜之數年。使出外傳道。不意其人心迹驟變。反誣先生種種惡迹。欲逢人張揚。冀敗先生之名。先生忍之。其人尋病卒。時人以爲忘恩之天報。距范村六里有小村落曰板楊里。居民張百順者。家業小康。素有烟癖。在天招局中戒除。因暇救主。其妻爲邪鬼所附。時發時愈。發時大呼曰。天不怕。地不怕。惟怕西張席牧師。先生聞之。躬往其家。爲之祈禱。逐魔。婦心乃安。與夫同行天路焉。村人因之信道者數十人。賃屋設一禮拜堂。先生常往講道。其後有信士張氏兄弟口角。弟竟擲斧砍兄。兄閃避。斧中旁觀郭姓之膝。先生往勸之和解。脫裘質資。爲郭姓養傷之費。人皆仰其厚德。光緒十年。先生祈禱之間。忽覺趙城縣城人民衆多。宜設一天招戒烟局。以爲傳道之計。繼念經費無出。手中惟有戒烟丸三千粒。然信上帝能祝五餅二魚。食五千人。何當退卻。因謀之同人。得師張二信徒。願往資藥。以去。過范村與板楊里二局。同人均以爲未可冒昧嘗試。二人抵縣城南關。主於求道者之家。其人亦懼縣民鹵莽。不宜輕嘗。二人正躊躇間。惟以祈禱上帝爲事。旋聞有款門者。則本城耆紳。夙聞天招局

之名。今知有人來此分設。特出而歡迎也。具道敬服之意。願任局宇器物之費。請二人留邑設局。其後教會亦興。先生繼又設局於霍州城。其開辦經費。則夫人捐簪珥所變也。此數年間。先生一身爲一方教會之柱石。東西奔走。照料局事。宣揚真道。又須合製戒烟丸。故幾日夕無暇。然猶禁食祈禱。不敢稍懈。嘗自記曰。『余三四年盛蒙天父之恩。用余爲合宜之器具。然惡魔屢用各種詭計。激余傲心。無知之徒。皆稱余爲牧師。更有背呼余爲活耶穌者。惡魔乘此使余自誇。不彰十架之功。幸上帝賜恩。使余燭破其奸。加意求主。賜余謙卑之心。願爲衆人之僕。引人歸主。』讀此可見先生見道之功深矣。光緒十一年夏。內地會教士司章蓋何四君。至平陽府。先生請之來村。四君寓先生家。見主日禮拜。規矩井然。先生解經時。又喜參以典故比喩。聞者無不津津有味。知爲上帝所選之材。非偶然也。其後。章君駐曲沃。蓋君駐隰州。何君駐大寧。司君駐洪洞。傳道設塾之外。俱仿先生之法。開天招戒烟局多所。晉省教會旣興。尙無華人職員。故內地會總理戴德生先生與范教士。特來平陽一帶。訪問教會。并擬按立牧師。洪洞一帶

教友。素仰先生爲牧師。惟未正其名耳。因合詞公舉先生。於是戴先生與諸教士。在安息日。按立宋某爲平陽府牧師。渠萬鎰爲大寧縣牧師。先生爲洪洞一帶牧師。又立長老執事等十餘。戴先生亦至西張村。觀先生之家。和氣雍雍。真不負樂園之名。先生請戴先生派女教士至霍州。宣道於婦女界。戴先生允之。先生旣任牧師。願復教會益勤。每年冬日。招聚各處信士。聚集大會。考問信德。施行洗禮。知教友平日所唱詩詞。俱涉淫邪。因另製教會新詩一集。教信徒熟誦。旣悅心懷。又增信德。其後內地會知先生設局傳道。最爲有益。因議推廣。託先生以用人之權。於是本省之平遙、蒲州、澤州、聞喜、徐溝、交城、祁縣、靈石、河南之懷慶、彰德、武安。直隸之順德、南和。先後設局。其間頗費經營。幸皆得上主之引導。得慶成功。先生又嘗親至陝西西安府。設一局。亦蒙士紳樂助。爲該地宣教之發軔。先生當日以一身兼督四十五局。其肩負可謂重矣。先生蔬食布衣。四方奔馳。見信弱者慰之。遇附鬼者逐之。處置危難。安撫信徒。以及中途遭盜。無不倚恃神力。祈禱獲勝。歷艱愈重。而其信德彌堅矣。先生出外巡行之時。旣多。家人諸事。悉

由夫人主持。夫人亦有賢德。善相夫。家中數十人。儼然一小教養局。各處天招局所需丸藥。俱在此製。合分布。加以種植牧畜。事務甚繁。夫人初不識字。信道之後。立志習聖經之字。遂能閱書。見先生所爲。無非推廓天國。雖數月不歸。亦不以爲苦。又思男戒烟局。既立。何不並設女局。謀之於先生。先生初頗難之。後見夫人志決。遂在洪洞先行試辦。有效。後且設於全省。先生之家名樂園。自成一家庭教會。定有禮規。禁絕飲酒游閒。自先生信道以來。本村不苦旱澇。人益奇之。晉省教會。年興一年。各處設立支會。推其中。有才德者。立爲執事長老。相教師治教會。先生初年調理民教相仇之事。不免假有司之力。其後頗知其誤。至光緒十七年。洪洞縣合屬信徒大會。決議凡遇外人迫害。不訴官吏。祇求上主。且凡願進教者。必先告以此例。其人誠心允許。方能受禮。此規甫定之後。先生卽躬遇試煉。因有隣人私挪界石。佔先生之地。先生與之理論。反以惡言相向。先生隱忍不言。村人咸以爲怯。既而其人病。招先生治愈之。初似有悔意。卒不悛。舊疾再發。暴卒。先生至是年漸高。然勤勞不怠。無愧善牧。光緒二十一年。先生年六十。知



己之體已衰。去世之日不遠。因招集各處之牧師長老執事。及天招局長。同聚西張村本宅。商議將來進行。并酌定增添輔助之人。庶主工得以日興。散會之日。又以路加福音十六章之語。勸勵同人。勿顧世事而求天福云云。其後先生至洪洞縣中。忽得昏眩之症。西醫調治不瘥。回家靜養。至光緒二十二年正月謝世。享壽六十有一。先生無子。衆教友哭之盡哀。如喪父母。

教史氏曰。慕翟先生有言曰。世如有一人。果與天父同心。則其所成就者。必爲世所震驚。如先生者。居腹地。友恒人。而乃一生所成。厥功甚偉。所設局中。戒烟者約計一萬餘人。因而信道者。約一千餘人。其布道之勢力。且及於五省之地。其故何也。無非一番血誠。與天父同心而已。先生之一生。經西女士著成英文專書。鮑君康甯又演爲白話。勿具載。今掇敘其概略如右。

名牧遺徵 卷四



陳大鏞先生事略

篇五

陳先生名大鏞。世居京師東南郊垆。距城僅數里。父名正美。業製履。先生幼時。從師讀數年。即入城中香店學業。一日在店中對帳。見街中一西人分售基督教書籍。先生性嗜讀。見有賣書者。頗注意。西士來店間。有願購書者否。店主人與之談論。詢以多事。西士一一答之。并出諸書相示。如德慧入門、天道溯原、福音大旨等。凡若干種。先生擇購一種。捧誦不已。能解其義。因起求道之念。數日後。正值主日。先生至倫敦會禮拜堂中觀禮。因晤西教士。謂前日所購一書已讀訖。西士詢之。知其於書中大意。頗已了了。奇之。先生曰。余甚願研究此道。西士曰。是固余所深盼也。先生因更索閱書冊。西士選合宜者若干種贈之。是後數月間。先生閱書之外。每安息日必到堂禮拜。西士亦器重之。願其母及妻母知之。頗不以爲然。恐其入洋教也。然先生操行淳謹。又無詞以責之。間加戒飭。阻其信道。而先生之志已堅。非他人所能轉移。因按教會規例。記名求道。迨試驗之期滿。則受洗而爲教友焉。其母見子之信道。引以爲重憂。然又不敢過於嚴切。因

其愛子之心固甚摯也。意欲早日爲子完姻。冀移其心志。適先生爲西士幹事有成。西士酬之百金。故遂可作成室之資。及婚期。先生擬接教會儀式成禮。其母大怒。斥辱先生。先生承順之。不爲動。待母怒稍息。卒接教會之禮結婚。夫人李氏。夫婦甚相得。先生不甘久營商業。因離香店。入倫敦會所設學校肄業。久之資斧告絕。不得不謀度生之事。倫敦會中同人。試以諸事皆不能以先生嗜讀。輒廢其事故也。時美以美公會。初至北京。詢諸倫敦會。有可用之人否。倫敦會西士因薦先生。并言其短處。美以美會西教士姑試用之。命先生執炊。則不能。又命之治雜事。則又以爲婦女之事。雅不願也。然西教士重先生之誠篤。因使之守門。先生執守門之役。意乃愜。因司閤事。簡得償讀書之願。遇人過其門。輒與之談道。蓋以門房作講道所矣。知之者敬之。不以賤役相待。旣而先生道益進。志益奮。以爲一身之事業。乃在傳上帝之道。因愈攻苦。取神學書籍。自修甚力。旋念苟爲牧師。妻不能讀書。是大不可。因婉言勸夫人識字。夫人殊不願。曰。余年已長。且家事冗。何能效君執卷咿唔乎。先生待數日。又語之曰。他書固難。問答一書非

甚淺近乎。卿何不試習之。李夫人仍不願。雖料先生之意有不讀不休之勢。然猶不甘從之。先生勸之再三。詞益嚴厲。終乃執夫人手。挈至後園。無人得見之處。竟施笞責。待其允讀書而後已。嗚呼。此先熱心之過也。然先生當時何從而知之。亦行其所安耳。吾人無得輕議。先生司閩數年。自修不輟。宣道亦甚勤。在講堂在學校在家庭。時聞其傳道之聲。而美以美會華北年會首結之果。卽先生傳道之效。其人非他。卽先生之父是也。進教之時。年已六十矣。繼而又引二人信道。同時領洗。一曰文會。旗籍孝廉也。一曰楊書。則以工爲業者也。教會見先生品行篤實。學道精勤。知其不以執役終。因授以勸士執照。使之專務傳道。而令先生之父代子司閩焉。一千八百七十四年。先生已擢傳道之職。奉教會命。偕楊書。賚公函。至山東之泰安。訪問新立之小教會。初山東泰安之安駕莊。有庠生曰王瑞福。以應鄉試來京師。在海台門美以美會講堂。得聞聖道。遂起信仰。屢來訪道。與先生長談。所造益深。旣返。傳道於其里。逾數月。遣其子誠培。行千里來京。乞聖經與他書一車。并開信道者之名姓。計十八人。誠培。孝子也。曾手御其太

夫人不遠千里而求真道。西教士見而忻悅逾望。留誠培居數星期。資以聖經與雜書一車。遣之歸里。於是泰安乃有北京教會之支會。乃由先生躬往其地。訪其教會焉。先生與楊書沿途宣道。以爲至樂。先生所至。儒士多有與之論道者。先生侃侃而談。未嘗稍屈。或詢之曰。君少不學。何以能屈儒者。先生曰。余祇熟聖經耳。此則彼所未諳者也。一千八百九十一年。教會見先生任事久而不懈。洵爲佳牧。於是按立爲執事。繼又立爲長老。是後歷任遵化、天津、山海關、鹽山、南宮、韓村等處。傳道事宜無不盡職。善言嘉行。爲人矜式。終任關外延慶州牧師二年。一千九百年拳匪之亂。六月間。美以美會華北年會聚於京師。先生事畢。挈夫人及幼子幼女回延慶州。時匪亂已亟。各處有毀教堂殺信徒之消息。會友請於先生曰。先生宜早日避亂山中。先生曰。否。苟余之教友不先盡行避匿。余不走也。迨七月二十二日。亂愈亟。會友見事機危岌。數請先生挈眷匿山谷間。山中道路曲折。地方僻靜。可保無事。先生見教友誠懇。許之。以是日行。有會友一人爲之導。行至城外十里。遇一人。詢之曰。君爲誰。曰。爲延慶州之傳道者。將焉往。曰。

將往山中。其人至前村。以告拳匪之首領。首領率衆追之。問先生行蹤。先生直答如前。曰。囊中有錢否。先生曰。有之。卽以所有與之。曰。以汝之衣囊與我。先生從之。首領旋對亂民曰。余事畢矣。汝曹任所爲可矣。於是亂民遂殺先生。斷其首。繼殺幼子。與會友之爲導者。幼女年方十三。見父兄被害。投母懷。曰。母歟。我等將何爲。我等將何爲。母慰之曰。我等將同往天父之處。遂並見害。數月後。事平。先生三子維屏（亦美以美會之牧師）來州訪遺骸。止得其骨。因匪人火化之也。頭顱亦不獲。再五月始得之。合葬於家壙。諸子體救主之教。俱無報復之心。惟曰。余願往該堂傳道。感化殘殺我父母之兇徒。其後清政府賠償教會損失。先生之家所損者頗鉅。諸子皆不願受。曰。吾曹尙可度日。不願領撫卹也。先生生子女七人。初生長女值元日。太夫人尙未明眞理。信世俗所傳。以爲不祥。謂以後將生女不已也。其後五產皆男。俗傳竟不驗。先生訓子女嚴。皆以聖經爲則。每逢安息。例留一人守家。以防失竊。諸子輪流值守。先生每令守家者熟誦聖經若干節。禮拜畢回家。則令背誦無誤。而後可。諸子入校後。暑假回里。先生責以熟誦

聖經。家中止二飯。讀經成誦。則各予大錢十文。購餅作午餐。其治家整肅。可以想見矣。其後諸子皆能自顯。蓋獲益於庭訓云。

教史氏曰。先生起身貧寒。克自振拔。其所樹立。卓卓在人耳目。皆誠篤刻苦之效也。及以身殉道。大義凜然。又何其烈也。後之君子。有志於道者。安可以貧寒自退卻也。



黃品三先生事略

篇六

黃先生名品三。晚年著作。署別號曰遇安山人。江蘇松江南匯煙霞閣人也。世居上海。無書不讀。學問淵深。蘊藉能詩。清超卓越。爲人和藹堪親。生平無疾言厲色。善音樂。工書畫。夙擅石谷南田諸法。精妙絕倫。與諸名士並駕齊驅。有過之無不及也。得者咸以爲寶。什襲珍藏。故滬地士紳。無不仰慕其能。而樂與之游。壯年棄舉子業。自中西定約。海禁初開。卽聞聖道。博稽精考。審知道由天授。教賴人傳。世人負慝。非藉救世之功。不獲救靈贖罪之恩。何能免永禍而得永福。爰卽銳志輸誠。遂於咸豐乙卯年卽一千八百五十五年受浸。以表悔改。是爲浸會東來首結之果。先生晚年。曾著信主起因記。詳述起信始末。曰「予少時塾課之餘。喜讀陰騭感應諸篇。弱冠後。研究佛老之學。凡金剛道德等經。誦必稔熟。猶耽卜筮戲法諸術。見有奇異而難悟者。必究其底理而後安。道光二十五年。同窗起集三元會。正七十月之望。各輪會分。香花供奉。禮懺持齋。求福田利澤也。越三年。歲饑。哀鴻載道。因勸同社諸君以會費助賑。以爲神若有靈。必以此爲是也。

詎料於四月間二旬之內。一子二女相繼殤。夫婦又染病累月。困苦特甚。不解天之報施善人。究何如也。愈後散步遣愁。過福音堂。見有西士講書。就而聽之。藉以解悶。毫不關心。意謂是或一道耳。咸豐三年暮春之初。有美國牧師高丕第夫人。請余授教女塾。午前讀儒書。午後讀聖經問答之類。亦不介意。惟得其脩而盡我分而已。然觀其夫婦之間。舉止語默。輯睦可風。心敬之。明年春。余有微恙。臥榻無聊。乃觀案頭新約。以破沉寂。覺其中別具意味。亦不外乎遷善改過。連觀三四日。卒一書焉。明日高公來。敘談間。余曰。我亦觀新約。誠善書也。高問何以知其善。余曰。書中大旨。在於改惡崇善。與吾心契合。是以善之高。爾能依而行之乎。曰。行之久矣。高微笑曰。恐未必然也。乃用譬語曰。凡居暗室者。有語之曰。室中有蛇蝎蝮螫之害。君宜速遷。彼必不信。因居於暗也。若以火燭之。顯諸毒害。其必奔走而恐後矣。今有罪惡。居於爾心。而不自知。若有道義之光。燭而明之。亦將趨避而悔改矣。余曰。我甚欲得此光。以明心性。子其惠我乎。高曰。我不能也。當求造化之主。卽獨一之神。非雕塑之偶像。乃無上之善。自然之美。無不知無

能矜憫爲懷。彼有真光。人若求之可得也。問當於何處求之。曰靜處即可。蓋神卽靈也。無形無像。無所往而不在也。子歸而求之。則得矣。言竟而別。余秘之夜不成寐。俟妻孥睡熟。披衣而起。俯伏於地。禱曰。造化之主。明明在上。鑒我愚衷。恩許道義之光。燭我幽暗。俾得明心見性。知避所當避。而行所當行也。如是者四日。家人未之知也。一日高公特來問別後曾祈禱乎。曰然。惟不見影響耳。高曰。須耐俟之。蓋得道有早暮也。於是論及律法救道。余問之曰。雅各書中有云。干一律卽干全律。果如是乎。曰然也。余曰。此實難矣。終日之間。言行意念。安能無過。以是範之。世上無全人矣。高微笑曰。爾言禱之無應。以我觀之。已有所進矣。曩者爾言書善已亦善。今於無意中言出守律之難。較之前日。已少有其光矣。此乃神之慈愛。示爾以徵。使爾前進。以入聖域。以爾不遠於天國。非若天之所棄者然也。爾其勉之。余聞斯言。心爲之動。是夜人靜時。誠意作禱。如是者七日。一夕祈禱之際。覺異於尋常。惟見歷來之罪。堆積如山。不可勝計。如帳目之展於我前。心目內觀。惟有服罪而已。知前之究心佛老。茹素焚香。皆行之不著。習焉不察。一如

捕風捉影。終身行之。不得其益。卽施濟之事。亦屬沽名望報。非由仁愛而出。近於鄉愿。向之自以爲是者。一旦傾頽。於是祈禱益切。亦靠救主耶穌之功。覺神在咫尺。垂聽我祈。遂以胸中一切恐懼疑惑。悉付之於基督之手。任其處置禱畢而臥。身心得慰。覺向之受侮於人。而欲報之者。頓然消釋。如薄冰之遇太陽。肺腑清寧。如熱病之得涼劑。自思今夕何夕。得以恕人之過。莫非天父亦赦免我罪。賦。朦朧中若有語我者曰。我固以赦過宥罪爲樂。今爾罪已赦。可安心爲善士。慎勿再犯。恐遭患尤重也。遂醒。反覆審思。眞實無妄。遂起而拜謝主恩。越二日。高公又來。余卽以所遇之事告之。高大悅。起而握手曰。喜爾得聖靈感化。罪已消矣。余問何謂聖靈。曰。聖靈者。神之正氣。一如風行。莫知其來去。人若得之。能知己罪而悔改。卽前所謂道義之光也。蓋神乃三位一體。曰父曰子曰靈。分而爲三。合而爲一。今爾既得眞道。肯與我等爲弟兄乎。曰。固所願也。高云。旣蒙赦宥。必須受浸。余曰。旣信矣。何以浸爲。曰。此乃主之命令。信而受浸者得救。古今所傳。不可廢也。談竟而別。明日同晏公瑪來詳問一切。加以叮嚀而去。余思此事當語於

家人惟恐其疑余爲狂。於是先將淺近而動聽者。如約拿約伯以士帖記。及約瑟被讒。至兄弟相會。漸至始祖食禁果。而受咒。真神許救星而勝魔。後乃講耶穌降世。代人贖罪。俾信者可由之而得救。神乃獨一。偶像無靈。祭祀無益。循循宣講。如是者月餘。家人耳熟。不以爲怪矣。然後方述祈禱得救之事。聽者皆曰。善。親友聞之。有作書諷諫者。余更直言剖答之。明年咸豐五年正月十六日。受晏牧施浸於黃浦中。宛似昔年之約。但河也。既入會。家人親友。無有責者。蓋先已明言於衆也。若初時隱而不宣。必有許多周折矣。爾時浸會門人。惟余一人。每日講道。即以所遇之事述之。凡得信道者。四人。迨咸豐七年。信者益衆。會中立余爲會吏。同治九年。受牧者之職。始得供牧之薪水。蓋以上十餘年。皆自食其力。得暇而講。惟主日必講二次。此余信道之來歷也。自初信至今。三十有一年矣。有時陷於俗。貨財有時罹於難。咸豐十年有鬧堂之事有時失於言。語近又有失於思慮。隨時起伏於心。一念之差。雖未顯爲而罪已犯矣。犯則心必不安。乃祈禱赦宥。力改其非。或一時即安。或累日而始得赦。或有數月而始釋然。良可畏也。然賴主培

植。可以堅固而不搖。至於言行交接之間。余常用恕字。覺最爲便宜。省卻無數煩惱。掩除許多罪愆。今年六十有四。血氣既衰。與道日近。賴主之心更切。故逢造次顛沛。如風吹河溢而來者。可以不動吾心。蓋心有主也。諒同行天路者。不以我爲迂。所遇雖殊。其致則一而已。』先生求道之時。曾繪一圖。靈魂坐於雲中。地面散置髑髏無數。下綴詩句。以表人靈太息。昔日舊居之意。一日爲西士膽寫馬太福音書。逐句雒誦。中心不禁感動。覺耶穌之一生。實有感人之力。因語高君曰。余之心頗合耶穌之心。以前余所干犯者。止數條誠命。此後自期可全守無缺矣。高君因告以誠律之詳義。并言干一條者。即爲干犯全律。先生聞之。不覺驚起曰。是則難矣。然細審之餘。覺斯言不誤也。因祈求上主益力。當時教會初來海上。學道者絕無。先生孤立向道。無可商榷。有疑祇能質之西士。然先生當時心中。猶有一番意見。以爲西士之性質。與我不同。彼之所能。或非我之所能也。故彼所得之平安與喜樂。我人恐不能與也。後經西士爲之譬說。救恩之普及人人。始得釋然。嘗誦主禱文。至求免我罪。如我免人之罪一句。惕然自省曰。我有舊

怨尙未恕宥。何能望得神恩。今必決意宥之矣。當下覺天光照心。積愆盡釋。樂不可言。以告西教士。教士勸以進教。先生曰。如教會誠如君之所述。且按聖經之言。則余願進會。然人言藉藉。動謂西教士有種種秘密行爲。余固不信之。但君等如果然者。則余不願與聞。余所甘心順從救主者。按余之所見所信者耳。當受浸之時。心中受大激刺。在水中不能起立。經人扶之乃起。信道之後。卽以傳道爲事。因之而信道者有十八人之多。一千八百六十三年。助晏瑪太教師譯新約爲上海土白。益通聖經之義。一千八百七十八年。晉豫大荒。先生聞饑民災狀。心甚惻然。向同人勸募。友人皆力綿。爲數甚微。交晏教士匯寄災區。晏公少之。爰向西商勸得鉅款。於是官紳聞風繼起。通力合籌。其效久而益彰。其始固由涓滴來也。先生自言。此爲平生第一快事。旣爲教牧之後。勤懇懇懇。忠於其職。數十年如一日。雖饔飧時有不繼。性曠達。威容不現於面。所說之經義。能發前人之所未發。使聽者樂聞忘倦。資高望重。爲海上教會之領袖。列門牆者。又多誠懇之士。以其餘暇。著爲詩文。刊登教會新報。萬國公報。畫圖新報。小孩月報。隱然教

會之作者。作文善諷諭。嘗著猶如道。驚夢記二文。尤多滑稽之趣。其驚夢記曰。『曠月既望。方夜讀書。既倦。隱几而臥。朦朧間至一大地。光明如鏡。不容纖塵。有五蘆列樹於中。知其爲演武場也。浩浩無邊。不知其幾千萬里。信步前進。至第一處。乃雜色彩旗。上有金字。書凡信主者歸此隊。旗下立一將。乃百夫長也。太馬八第二處紅旗。上書熱衷傳道者歸此隊。旗下—將。乃保羅也。第三處白旗。上書心潔者歸此隊。旗下—將。乃約瑟也。創世紀三十第四處黃旗。上書忍耐者歸此隊。旗下—將。乃約伯也。第五處黑旗。上書自訟己罪。謙卑遜順者歸此隊。旗下—將。乃稅吏也。路加上八第五將皆首戴救盔。身被光明之甲。手執靈劍。形容端嚴。惟此隊不見一兵一士。心殊不解。正疑間。忽聞空中角聲甚厲。見自西自東自南自北而來者。如風雨驟至。皆認旗而集矣。雜色旗下。有誠有僞。其數如河沙。紅旗下義利兩途。亦不可勝數。白旗下廉貞婉美。其數可約而得。黃旗下長短有殊。數較白旗少遜。黑旗下輕重有別。但其數寥寥無幾。余竊代爲之愧。然視其將。則怡然自得也。我聞自天有聲曰。當以先者爲後。後者爲先。屬黑旗者。可將上品



榮賜之。因彼能克己背十字架而從我也。蓋我曾有諡。凡自卑者將舉爲高也。時我見彼等光耀如日。遊行於天國。黃白二旗之衆。亦各得所許之恩。入於永生。又聞上云。可將紅旗中之義者。接入樂園。受其所勞之值。我見諸義者揖讓而入。快樂無量。又云。將利者可驅入幽暗。卽爲魔鬼。時我見其中。有外飾如羊者。有爲羊傭者。有伴爲長祈。有周行水陸。招人入教。而使之陷罪者。有強欲爲首者。有以警相警者。俱被逐於幽暗。在彼哀哭切齒矣。又聞云。可將雜色旗中之誠者。延入神國。蓋凡信主者得救。免淪亡而得永生也。我見諸誠者皆衣以潔白。居於恩座之旁。頌美不已。又聞云。彼僞者可投之火坑。卽蟲不死。火不滅之處。時我見有虛妄者。圖利者。倚勢者。污穢者。躁率者。怨恨者。驕傲者。流俗者。皆痛苦而受報。且服主之義判也。我乃就黑旗之將而問之曰。何此隊歸者絕少。答曰。世間皆以謙卑認罪爲可恥。雖殷勤事主者。亦忽於此。故誠義廉潔。爲道耐苦者。世不乏人。而獨於虛心自訟。逢逆自反者。天上珍如至寶。欲覓一二而不可得。可爲長太息也。我聞之泣下如雨。蓋自視僅在雜旗之列耳。聞角聲又起。雷霆轟轟。

一驚而醒。四顧寂然。側耳聽之。乃城堞笳聲互動。門前車乘疾馳。噫。此所謂日有所思。夜有所夢耶。抑主見我之不愼。而特示此。以使我恐懼加謹耶。古人云。世事無非一夢。則我之夢可謂之醒。惟以醒言述於人。人皆謂之夢。然則凡在教場中者。究屬醒耶。夢耶。我不能必。當場者定宜知其然否也。因錄之以誌其異。』先生著講餘漫錄。道影類編二書。漫錄爲其歷年見聞心得之言。類編取世俗之瑣習。以表其合於聖經之規例。俱未刊行。製讚歌至今通用。又作字母書。中西人士便之。光緒十六年。即一八九〇年二月初二日。以微疾歿。享年六十有八。入殯之日。執紼者二百餘人。多爲之垂淚。教史氏曰。平樂張文開君。輯先生之遺文。泐成光導一書。因叙論先生之生平曰。一師乃中國最上流。復爲多材多藝之人。二師爲上海浸會首實之果。純由天授。非人力也。三師未入教之先。詳語家人。使共知奉教之要。不阻礙其進行。四師未居牧職之前。傳道十餘年。自食其力。不受教會分文薪水。五師在教三十四年。無一日不以干犯上帝之法律爲懼。臨深履薄。比曾子之守身而尤謹。凡茲五者。皆師之所以垂訓後人也。

謝談庵先生事略

篇七

謝先生名行棟。字談庵。浙江鄞縣人。一千八百二十五年爲清道光五年。誕生家貧。三歲喪父。上有二兄。下有一弟。太夫人賢。撫孤成立。且不令失學。先生事母孝。兄弟友愛。性嗜讀。以貧故廢書。從事商業。然問學於士人不輟。有同志數人。時以暇日相講習。後其二人者信奉基督。先生因之得聞眞道。時丁冠西先生躋良。居甬城府前禮拜堂。分設講道所。每日宣揚眞理。先生往聆焉。舉種種疑難。以質丁君。不下數十百條。丁君一一爲之剖晰。使之胸中了然。然後知基督之教。果爲正道矣。然疑端已去。而決志正難。以當時吾國人士。不知基督教爲何物。凡有習之者。士林卽不齒其人。以爲不忠不孝。家人戚族。視爲寇仇。先生旣宣進教之意。家庭中大起風波。兄弟怒詈不已。老母且笞責之。百方阻止。必求其反悔而後已。乃先生事事承順。甘受屈辱。而信道一事。厥志旣定。則終不可回。母兄之命。亦所不敢從也。奉教之後。受聘爲女學校教員。凡一載。先生自覺宜爲天國效力。因請於西教士。願任傳道之職。時教會初立。宣教之難。如行荆

棘中先生不顧。惟知爲主犧牲而已。初宣道於山北一帶。爲時三年。盡日宣勞。無時或息。凡茶坊涼亭。遇人卽傳。該地諸鄉村。無一處不爲先生足迹所經。入夜猶與求道者談論。更深而後休息。計其效果。則得信徒二千人之譜。按當年時勢論之。固可謂之有效矣。一千八百六十年。先生覺平日未研神學。心終不以爲然。因從倪維思蘭顯理二教士受業。肄習道學。故移居府城。司講堂事務。半日讀書。半日傳道。一千八百六十一年。太平軍破甯波。先生講道不止。爲其掠入營中。弟以避地來城。亦被虜焉。弟兄居匪中。備受艱辛。而先生見匪軍雖號崇拜上帝。但其種種作爲。實與禮拜偶像無異。中心戚以爲一旦命我同拜。我必敬守教規。不肯附從。是殺身之禍。卽在目前也。賊中每日例點從軍者之名。命之跪拜。有不遵者。斷脰無赦。先生入營。初二日逢點名。以事規避。至第三日。知無法可免。因懇切祈禱上帝。旣而中心安恬。一無所懼。惟待天命而已。念及弟尙未信主。殊以爲憂。因涕泣而道之。勸弟速皈救主。且與之同禱上帝。語之曰。今日我與弟將永別矣。及點名禮拜時。乃偶越先生之名。因得幸免。先生知此後日日身

處死地。苟不能出營。則終不免殺身之禍也。是夕十時。聞有呼己名者。出應之。則西教士二人也。相見大喜。蓋西教士聞先生被掠。無日不往太平營中訪之。久而不得。將絕念矣。是夕姑作末次之搜求。竟得之。請於首將。先生與其弟俱得出營。還江北岸租界。時全部盡陷於太平軍。惟江北岸一隅。爲西人居留地。不相犯。太平軍亦憚西人。有所語。輒從之。是以先生與弟得全其首領。蓋先生與諸信士。虔求上帝之效也。先生自後常自慶爲再生人。益以厥躬奉獻於上帝。不敢自私矣。時城中流亡困乏。不可名狀。西士設救濟局於江北岸。以資助之。先生分司其事。凡救出陷匪之人。無算。一千八百六十二年。先生神學科畢業。受准試職。隨巡行浙江省西部。宣傳救道。是年秋。伴麥嘉締博士至山東之煙臺。開荒傳道。時風氣未開。人苦遠行。先生以南人而北游。其難甚矣。然先生爲主名而受之。無異詞。居一年。夫人得疾。乃還寧波。一千八百六十四年。受職爲牧師。是爲美國長老會之第一牧師。殆亦爲耶穌教會中華第一牧師也。初治山北一帶會務。信士共約七十人。分居六七區。占地約六十方里。任事四年。調爲上虞牧師。

全縣皆爲其轄境焉。駐上虞先後十三年。願復教友。傳宣真道。無一刻閒。每巡行鄉鎮。一日步數十里。回家則疲憊異常。途中遇僻靜之地。則獨居默禱上帝若干時。而後復行。當先生牧上虞之日。值北方諸省大飢。先生曾至山東。助教士放賑。時先生年力漸衰。遠道跋涉。殊爲困頓。災區疫癘流行。同往放賑者數人。不得生還。而先生獨無恙。一千八百八十二年。先生受職爲寧波崇信學校校長。旋以事煩體弱。不能負荷。乃告退。仍以傳道爲事。尋奉教會使往南京傳道。時南京爲新闢之布道區。故艱阻益起。先生居彼五載。一以生平堅毅之操處之。遇百難而不縮。卒因喘病大發。不得已而旋故里。教會念先生年高。不復任以繁劇。因居府城講堂養病。然先生不自暇逸。主日說道之外。亦開堂宣講。因之而信道者尙若干人。奉先生爲靈父云。一千八百九十五年五月十二日。安然逝世。是日適爲安息。距其受洗之日。足四十週年。易箴時再言感謝上帝而歿。享年七十一歲。先生一生志意堅卓。不爲浮言所動。太平之亂既平。先生以救濟陷賊者多人。例可得官府獎敘。其兄因爲之申請。先生阻之曰。母然。余已得天爵焉。用

此人爵爲教三子以真理。期以傳揚聖道。勿求世秩。一子畢業學校後。有志考試。先生戒之曰。殊可不必。昔耶穌選徒。不因其科名。汝惟爲主之宣道者耳。科名不足爲汝重也。後三子俱爲牧師。克副先生所望。蓋庭訓頗有力焉。先生講道。惟以傳揚基督爲主。一日在講堂宣教。有婦人聽至半而出。先生追及之於衢中。語之曰。汝曹慎勿忘耶穌。乃上帝自天降世。救贖沉淪之人者也。平居立身。剛正取與不苟。一芥無欺。朋友稱之。當其購物店中。找資誤逾定額。先生悟。則取還之。店賈異焉。許諾必信。見義勇爲。嘗質衣以助人之急。受恩未嘗一日忘。每日家禱之際。輒爲施恩於己者代禱。嘗曰。余受人之恩。不及報諸其人之本身。則轉而施之他人。卽所以報恩焉。性嫉惡。見有不守正道者。面訓無貸。嘗有教友於安息日留傭二人在家操作。而已來堂禮拜。先生知之。期期以爲不可。其人不聽勸。先生因願付二傭工值。而招之來堂。共守安息。其長子志永。嘗謁叔父。歸稟先生。謂叔父曾以祭文授之。使跪誦先祖之神位前。先生聞而色變。迨志永告以己未嘗從命。其容始復和。當太夫人病亟。先生適外出。聞報連夜奔回。則太夫


人已棄養。先生入臥室。見二燭燃於桌上。先生取而熄之。曰：無須從流俗也。治喪諸子。例當跪誦祭文。以告先靈。家人皆跪拜。先生率諸子佇立不跪。且高聲曰：行棟與諸子未跪。禮竣。家人責之曰：子不跪則亦已矣。何又高呼爲。先生曰：非也。余無擾衆之意。惟戚友中有失明者一人。恐其誤會。余奉教亦蹈舊俗。故朗言以明之耳。先生信道四十年。其脫革舊俗之嚴切。里黨咸知。故迎神演戲者。從不入其門而募捐。先生治家有法。讀經祈禱禁食。俱以身作則。率家人奉行。諸子在校。先生每次與書。未嘗不引聖經及先哲之訓。以爲勗勵。立規戒若干條。命諸子守之。違則答責有定數。一日子偶犯規。先生答之。子啼。父亦垂淚。然答數不足則不止也。其愛子女。誠將之以義矣。然自治亦甚嚴。嘗偶出不謹之言。卽自捶其額。以自讎焉。長子志永早世。先生悲之。旣而曰：兒乃先我昇天矣。居恒曰：余聞一信士犯上帝之律法。不如其早死之爲愈也。因兄弟尙未歸主。先生爲之代求。終其身不懈。晚年體弱。不能到堂聽說經。每令子歸述其所聞大旨。曰：是亦反哺之道也。有問以年者。先生曰：虛度三十耳。其人詫先生之容老。先生解之。



曰。三十以後得重生。歲非虛度。惟前三十年。乃真虛度耳。

教史氏曰。先生一生忠直仁厚。傳道不倦。可爲後生法矣。末年嘗語家人曰。我死勿爲我悲。惟當感上帝恩。使我得再生耳。死生一也。死後得晤耶穌與諸友。則益有福。屬纊前二日。曰。後安息日。吾當離汝曹。卒如其言。志氣清澄如是。非得道之真者。而能之乎。

名教遺徵 篇七



孟繼賢先生事略

篇八

教主降生後一千八百六十五年。即清同治四年。英國長老會宣教師賓爲霖君來華宣道已十八年矣。賓君熱誠之士也。在本國傳道有聲。來華宣教。刻苦愈於他教士。他教士觀其操行。恒嘆仰莫已。時君駐北京。方譯本人約翰之天路歷程爲正音。此固中國教會一絕大著作也。其明年。君出京師。沿途傳道。至西南一百八十英里外之深州。唐風鎮。居之一月。四出傳道。得信者三人。一曰張太元。尋常之信徒也。一人佚其名。信道一載。爲分書者。繼而失其信仰。陷爲盜首。卒受官刑。又一人曰孟傳真。則先生之父也。傳真翁有弟曰傳善。自幼寄跡空門。行蹤靡定。翁幼年讀書未成。即治家事。以豪俠自負。博觀勸善書籍。身體力行。親友欽其端謹。知拳術。太平之亂。倡練鄉勇。與匪軍對抗。以膽略聞。夫人張氏。生五女三子。惟先生與弟繼曾及一女長成。餘皆不育。翁時以勸善書爲家人講說。故一家咸有向道意。張夫人善治家。勤紡織。每夕工畢已半夜。必至神前叩首若干次。而後歸寢。婦女有舉善會者。必量力捐助。全家向道之心。無時或

息。故聞真道者。不禁忻然樂從焉。其後信士李殿元、項學賡、張雲芝、范清士、張永清。先後至鎮宣傳主道。翁與張太元擬往京中謁賓教師。請領洗禮。適一千八百七十三年。公理會員以撤教師等設堂於保定郡城。其明年。翁即領洗。翁任綠營徵弁。性和易。待營卒有恩。每相與痛飲。至醉而後已。家有田業。以飲廢治生。典質漸盡。祇贖小屋數間。以庇風雨。有志求道。釋老之言。皆曾研究。自賓君處得聞真道。飽領一月。非事故未嘗聞也。賓君去而學道之志不衰。賓君遺之聖書一冊。誦讀不已。每遇苦難。恃經言以得慰藉焉。一日張夫人謂之曰。君言信此書之語。宜信耶穌。不宜奉偶像。則何不逕從之。翁曰。然固余所願也。得卿言而決矣。何日始之。夫人曰。既知之。何可遲。即在明日。次晨果毀去家中神像。讀經祈禱焉。待公理會設教會後。未數月即進教。而爲保定府之首果。翁自後改行。爲人終身和藹小心。仗賢妻之助。同行天路。教會初立。祿多工少。貝教師請之相助。因其導引而歸基督者。不下二十人焉。先生幼時。因家貧。嘗與弟繼曾。在田拾廢煤供炊。翁有志令二子成學。先生年十歲。即入保定府小學校。年十六。在禮拜

時聞講師述基督受審及被釘狀。心大感動。涕泣懷思。如是一星期。立志求牧師施以洗禮。且獻己身。以傳基督之福音。以報神子拯救之恩。此後終身心目間。不忘教主受苦之影像。先生既受洗。富教師善引之。至通州協和書院肄業。時年方十七歲。五年畢業。又入神學校肄習三年。脩學之時。乘時在四鄉講道。先生幼時。志向即已堅卓。見善必趨。不稍游移。祖母鍾愛之。嘗命先生居己家。不可從父習西教。先生一日在田操作。聞西教士講道。往聽之。知其真。遂不顧祖母之命而信道焉。在校之日。有所見到。卽力行不怠。意有特異之處。雖師長不能動之。年十八。已從西教士旅行各村鎮宣道。雖盜賊蠱起。徧地荆棘。不顧也。遇難事。他人所不願任者。先生獨引以爲己責。不稍畏卻。且處之怡然。不使人覺察。每主日早起走三十里。至鄉間清涼鎮講道。待晚又步回郡。其勞苦如是。父歿三年未葬。先生與弟以歷年所積微資。并舉債於相知。歸葬四百里外之故里。悉遵教會定章。嘗思叔父雲游無定。因欲迎養以盡後輩之心。讀提摩太前書及引家歸道一書。益動於衷。乃邀友人王萬仲。四出訪問。久之始知叔在正定平山縣。

先生星夜奔馳。見面不相識。細談始知不誤。因勸叔回家。叔頗難之。因染烟癮四十餘年。不能戒絕。先生婉言勸導。接歸保定。合家相會。不啻隔世。叔卒戒烟。學道成爲信士。先生畢業後。傳道數年。年二十八。受職爲牧師。前後十四年。主理保定府教會。區域頗大。信徒計成人者六百餘。其辛勤可想。每至四鄉探訪信士。大率徒步而行。自初二十餘年。寒暑盜賊。無險不經。每說教。不以詞藻見長。而言語有骨力。如其爲人焉。庚子年春。保定府有奮興之會集。先生首自起認往日之過失。謂事主未能盡心。得人未能盡力。願以後益效忠天國。向主獻身。言已。因垂淚不止。是年夏。拳亂已亟。保定城外天主教堂見毀。先生在通州年會未竣事。五月初二日。聞蘆保鐵路被毀。卽曰。余當返保定。與畢先生同顧教會。次日孤身徒步。徑往保定。是時先生之往。不啻身投網羅。先生固已知之矣。而卒不避者。知分之所在也。鐵路旣斷。西員遇害。南鄉教友郝玉良爲族弟殘殺。於是省垣情形日急。男女學校先行解館。教堂內外頓形冷落。教外友人語先生曰。君胡不暫避。答曰。吾爲本會之牧。如走匿。奈羣羊何。信士亦勸先生隱避。先生曰。吾

乃中華牧師。若走避。奈美國牧師何。吾甘願與本堂教士多人一同生死。又囑至友田君和甫曰。君攜吾子提多他往。如蒙上主恩佑。得出匪手。吾爲正道捐軀。亦所甘心。父子灑淚而別。六月二十八日。先生因屋主催促交屋。正在南大街講堂。收拾書物。時屈申刻。拳匪突至。先以手槍擊頭。又將一臂扭折。牽之禁於七聖庵拳廠中。教士畢君請官吏釋之。不應。終夕受嚴刑凌辱。次日爲匪殺於廟後。棄尸溝中。其後城中教士亦盡見害。是年十二月事平。弟繼曾收其尸。二手猶交縛焉。先生既遇害。其三子亦均爲匪所殘殺。田君挈先生長子提多離省垣後。野居穴處。備受辛苦。迭聞省中惡調。知左近不能免禍。因圖遠走。向友人措得川資。欲往山西訪其戚屬。行至張馬莊。爲匪捕獲之。長幼俱繫。將受殺。有老婦若干人。見提多年方十四。貌俊美。忽動矜恤之念。垂淚語匪曰。成人作爲奸宄。汝曹殺之可也。此穉兒何辜。汝曹乃亦殺之。適里中有張洛靈者。素日威鎮一鄉。至是躍身而出曰。吾活之。養爲吾子。倘有不測之禍。吾盡當之。於是田君與提多皆得免。張君後以提多歸之。繼曾牧師有日本紳士川本政之助者。聞而重之。

資之肄業東瀛焉。先生一生刻苦自守。惟以正道爲慰。遭妻女之喪。信主之心。不爲之小渝。所入雖微。必以十分之一奉獻。保定之教友。無不愛而重之。奉之如父。西教士之同事者。見先生之立身治事。皆嘖嘖稱難得焉。

教史氏曰。客有至北直者。聞保定之教會。輒與孟牧師聯綴而不離。蓋其二十年牧養教友之功深矣。其間撐撐危難。撫循愚弱。事蹟無限。先生不爲人道。人亦無由知之。故不得而傳。余昔年晤其令弟省吾先生。言及其兄猶彈淚不置。嗚呼。傳真翁一忠厚長者。得二子如此。家風可謂盛矣。



王煜初先生事略

篇九

王先生名炳耀字沾輝號煜初。廣東莞人也。世居虎門。生於一千八百四十三年。後四年。父元深學道於郭士立先生。受洗禮。助教士宣揚救道。一千八百五十年。至福永傳教。先生年八歲。領洗於禮賢會羅全德教士。繼入葉納清教師所設禮賢書院肄業。一千八百五十八年。英法合兵攻廣州。寇氛甚惡。元深公命眷屬還虎門故里。而已獨留福永堂中。一日有兵士數十人。擁入福音堂。執公至沙井村。繫於祠柱之下。欲待次晨解官領賞。觀者如堵。公心中默籲上主。入夜。有不識姓名少年。暗釋公。祠中兵士方專心分派掠物。公經其中而出。亦無人顧問。因此得免於難。明年。先生從羅教師至香港。居巴陵育孤院中。一夜忽見母立身前。倏而隱形。翌日。先生以母爲憂。及第三日凶聞果至。母逝之時。正先生夢見之夜也。乃奔喪歸里。喪葬既訖。元深公再挈先生抵香港。受業於葉君納清。葉君尋由香港還居歸善。嫌先生讀書遲鈍。語元深公。不如爲擇別業。元深公深以爲憂。屢向先生訓誨。並爲之代禱。一千八百六十一年。先生年十八。

歲。定志攻苦讀書。以備後日宣傳福音。學問自此驟進。三年後。體衰弱似患瘵。然竟無恙。一千八百六十四年。歸善一帶霍亂症盛行。死亡相繼。葉君顧恤病者。夜以繼日。侍湯藥。申勸誨。不辭勞瘁。見一病婦爲人所棄。收歸己宅撫養之。當夕長子染疫。次晨君亦得病。先生與弟炳堃侍君父子至死。且葬之以禮。時一城之人。非死卽逃亡。鄉里爲空。而先生兄弟。獨處病者之中。亦竟無恙。次年。公孫惠教師。請先生傳道於石龍。一千八百六十六年。花之安教師。請先生傳道教讀於虎門。次年。先生成室。仍還居石龍。是年肺病之象又現。而終慶健全。明年再至虎門。居一年。長女生。繼而命眷屬至東莞。事元深公。先生獨居虎門。一千八百七十年。粵省謠傳神仙粉迷人之事。莞邑人民以誣元深公。風聲甚惡。居之可危。友人至石龍者。告先生。謂家人存亡在呼吸間。先生卽乘舟至東莞。或勸不可自蹈危機。先生曰。生命之權。屬之上帝。人何能爲。我豈畏死哉。在舟中。猶爲人講論眞道不已。力辨神仙粉之妄。斥匪人嫁禍教會。聲情激烈。目無餘子。是日逆風。舟行甚遲。先生不能久待。因半途登岸。取捷徑抵邑。見教堂已毀。繼母與室

人之衣履。分懸圯垣之上。過之者尙紛紛言元深公誘拐婦女入堂。爲數甚衆。故有此衣履云云。其愚妄一何可笑。先生旣不得家人蹤跡。乃取道石龍至廣州。始得相逢。則知家人所脫者爲奇險。而已所遭亦虎口。蓋當莞城亂衆毀堂時。先生之長女。生甫六月。爲匪所得。將擲於石上死之。孩入匪懷。乃不啼而反笑。旁一人因語匪曰。嬰兒何辜。汝觀其笑容。而忍殺之乎。因取而匿之。後歸於先生之家。其人蓋向日曾受元深公治病之恩。故以此爲報。且助先生一家得脫匪難。而抵廣州。他日有一兵士素識元深公者。語之曰。嚮日汝子在舟中傳道。得免於難。真大幸事。因舟中有棍徒多人。聞其講道。定意待舟抵埠。卽羣起毆斃之。乃先生中途上陸。故其計未遂。是歲先生之肺病益劇。禮賢會許之休息養疴。元深公憂先生之疾甚。嘗黎明卽起。向上主呼籲。求保先生之命。先生獨居福永養疴。眷屬仍隨元深公居東莞城。一千八百七十一年。神仙粉之謠又起。東莞一帶教堂。盡被折毀。時公孫惠教師居石龍。主持公會事宜。函招元深公。商議要事。元深公甫離東莞。堂卽被毀。至石龍則公孫教師亦已經官護送回省垣。公因


乘渡船回東莞。抵埠。聞人言堂宇已毀。因自僻徑回城。途遇匪人。正持掠物而回。有識公者。將執而投之河。或曰我輩已取其物。何必更取其命。公由此得免。乃轉至鄉村。求庇於友家。友亦不敢久藏。乘子夜送之至廣州。後公在香港遇其友。知公脫難後。村人來搜其家。欲得公而甘心。友告以不在。村人怒。將攻之。友因懼而走香港。先生在福永。聞東莞鬧教。眷屬移避香港。因卽隨往。覺港地天氣。於其病體較之內地爲宜。因求教會許其在港執業。一千八百七十三年。巴陵會姬教士。請先生在育嬰堂中傳道教誡。先生病體已日健。未幾。果得霍然。先生在育嬰堂十年。盡心教育。堂內女生。日後多爲女師者。無何。姬教師捐館舍。夏教師繼任。益重先生之爲人。一千八百八十二年。請於巴陵會監督。按立先生爲牧師。一千八百八十四年。香港倫敦會之道濟堂自立教會。擬聘先生爲牧師。以港中傳道人。品學無出其右也。道濟爲先生最早之教會。歷年擴充。得人最盛。購地建堂。經費日裕。而苦乏牧者。見先生才德閱歷。均爲教會冠冕。因有借材之意。先生素持教會自立主義。意見亦相孚。道濟堂諸長老。因請於禮賢會夏教

師許先生居任。使自理會友有所矜式。禮賢會同人。講知該教會之重要。先生之才。又足以勝之。念同事一主之誼。慨然允諾。於是先生遂爲道濟新堂之牧者矣。日則出門宣道。夜則在堂主講。爲道執掌。寒暑不輟。重訂新章。講求自治。與先後任長老黎君福池。高君鳳樓。區君鳳墀。尹君文楷等。同心辦事。會之壁壘一新。信道人。有疾必親自慰問。不分宗派。見有道心冷淡者。不憚苦口勸導。惟以拯人靈魂。助人生計爲事。港地爲商賈往來之區。遷民流遷無定。教會之建立不易。先生知人善任。先進後進。悉無棄材。注意提倡實業。資助貧寒教友。如今日所存之編籐。栽植。牧畜等事。實先生爲之。先河復倡。辦澳門傳道會。建堂曰志道。今已能半自養矣。一千八百九十四年。大疫。患者均昇至治疫廠。人皆視爲危地。無敢近者。先生獨不懼。時往廠內安撫病者。一日由廠回。忽發熱。家人惶恐無措。幸得無恙。愈後。仍往廠不輟。港地多疫。春夏間爲甚。先生貽書政府。謂市中人稠地窄。貧民難得滯所。無怪穢氣熏蒸。政府宜多設浴室。以滌除污穢。政府聽其議。一千九百零一年。香港半年不雨。水乾塘涸。政府雇舟運水。耗金十餘萬。

以此議設水表。限制居民用水。先生聞之。謂貧民將何以堪。因上書抗議。復貽書華南公局。聯合全市鋪戶。公請撤除水表之例。政府意稍回。於是華商公司。得另擬便民之法。上呈理藩部。得如所請。新例不行。至今香港士庶。飲水思源。咸謂發端抗議。由先生始也。戊戌變法。準士民上書。先生上萬言策。痛陳中國積習之弊。情詞政事起。其策不得達。庚子拳匪之亂。李文忠公督粵。先生又上書詳陳靖內綏外之策。亦未果行。凡此皆證先生平日之關心地方利害。國家大計也。公餘之暇。更多著述。有孝道折衷。播道說。教士上書。中日戰輯。說教雪等。俱已刊行。又苦常人識字不易。教育無由普及。因本音韻之學。造簡字一種。凡人學之二句。即可讀書。成拼音字譜一冊。會上之政府。著總理衙門攷查。適戊戌政變。不果行。先生歷年以來。爲會內外諸事。心力俱瘁。一千九百零二年。告假休養。是冬一病。遽爾不起。易簀時。世事一無所問。惟念八十餘齡之老父耳。享年六十。至今港地信士。無不推先生爲道濟堂自立之元勳也。德配葉氏。有男子六人。寵勳寵惠寵佑等。俱有聲於時。女子三人。

教史氏曰。先生以病軀而能自奮。不辭艱苦。爲主效力。志意一決。終身不退。所謂身弱心強者。正先生之謂也。幼時在學校。聞禮賢會有教師數人。在南洋洲島。爲野人所殺。分啖其肉。生徒問其師葉納清教師曰。如此險地。而有人繼往乎。教士曰。此何足懼。多人爭先欲往。設需派華人去。諸生中有誰甘心捨命。公即應聲曰。某雖不才。倘若需人。我願前往。葉公奇之。其置生死於度外。已見於童年。及任道濟堂牧者。能以自養自治。爲各教會倡。雖曰憑藉者厚。亦先生之得衆。有以資之也。先生心在宗國。每念時局。未嘗不太息痛恨。徒以身不在位。手無斧柯。因假著述以表其志趣。一再上書當道。俱格不行。使其所言得用。則詎非國家人民之福乎。

名牧遺徽 篇九





何福堂先生事略

篇十

何先生名進善。字福堂。廣東南海人也。生於一千八百十八年。爲清嘉慶二十三年。家貧。父業印刷彫板。時教會尙不能入內地。教士東來者多駐麻六甲。傳教於華僑。瑪禮孫先生設英華書院於其地。兼印刷書籍新報。以濟傳道之不及。先生之父。爲瑪禮孫先生所招。至麻六甲工作。寄資歸家。而不躬還者若干年。父去家時。先生尙幼。迨年漸長。辭母往麻六甲省父。遂肄業於英華書院。年二十一。受洗爲基督徒。初先生之於道。並未深有所得。所以領洗者。強半出於父命。且從西教士之請也。後習英文聖經。讀救主一生及聖道大端。始有端緒。而後心地明澈。皈依基督。誠副信徒之實矣。嘗伴教士之子至印度首府加爾各達。肄業於主教書院者若干時。有教授曰馬蘭氏。待先生有加禮。且從先生習華文。蓋先生自幼在粵。所習國文頗優。以家貧無力攻書。師傳器重之。勸其家人。勿令輟學。謂此子他日必振家聲云云。則先生自幼之頭角嶄然。亦可見矣。旣而先生自印度返麻六甲。仍在英華書院肄業。從理雅各博士游。師徒甚相得。共

講聖經神學、世界歷史、教會史、諸科。先生於英文已深造。益縱覽各家註釋等書。理博士乃授以希伯來希臘文字。先生已能神悟。未幾。卽能誦原文新舊約。先生自課之外。兼助教之職。每逢安息日。到臺宣講。先生說教之才。如有天授。言滔滔動人聽聞。蓋自始已然也。先生幼時。家人沿舊俗爲之結婚於某氏。至是妻父特由粵航海至麻六甲。促其回里成婚。先生初頗苦之。欲弗聽。經同鄉戚友。咸以大義責之。以爲長者所締之約。不可背。先生乃允之。適倫敦教會之總部。自麻六甲而移至香港。先生故僭理博士。同移香港。按先生當日之學問。已爲吾國彼時所罕見。如入政界商界。或在港爲英政府辦事。均可得巨俸。招致之者頗衆。然先生志在教會。不爲世俗所移。故願作傳道之事。受俸雖微。所不計也。西士見其以義爲利。益加優待。先生擬回里完姻。然與戚友約。事事須從教會規則。不得沾及邪俗。戚友佯許之。意欲誘其入內地。則先生孤立無助。不患其不俯從也。先生不疑而往。及期。則戚友事事反前約。欲強先生從俗。先生患之。乘宵潛回香港。戚友見失新郎。大駭。遂至香港訪得之。先生堅持送婦至港成禮。戚友

嗒然從之。先生處家有道。教婦以讀書。後能識字。不久即皈依救主焉。時港地倫敦會華牧。惟先生一人。先生因奮其力。勇宣救道。然七十年前。人心未動。世俗視眞道如毒藥。故雖以先生之口才。亦未能多結果實。先生以一千八百四十五年受職爲牧師。主持教會事務。其傳道也。取題廣博。不限一途。敷說精詳。朗如列眉。善演譯。使聽者身入其境。自然有感。一日嘗拈雅各書中「汝聞約百之忍耐乎」一語爲題。因座中人罕聞約百之生平者。先生詳演之。至約百身患惡瘡。周身作癢。取地上瓦片搔之。語時伸手下向。作拾取瓦片之勢。堂中諸人。俱有徧身作癢。伸手取瓦之感。覺其述事之妙。有如。是者。又一次。講解聖詩一百三十九首十四節。言人身結構之妙。先生敷陳手之奇妙。與他動物之肢。一一相較。比例精細。主義特出。聽衆中一人不禁呼曰。視之視之。又一人曰。聽歟。勿譁。如此妙論。非常之遇也。然先生講經。不具詳細底稿。祇錄綱領於一紙。以備遺忘。而出言妥帖。無衍詞。無浮語。如取其所講者。隨手錄記。卽成一首好講義。便可付印。無須脩飾也。理雅各博士稱先生之說教曰。余在英國。聞名牧之說教多矣。如

賈爾懋氏（弟格爾著名口才之教牧生於一千七百八十年卒於一千八百四十七年）華德勞氏、平尼氏等皆一時之選也。然何先生進善所講實足以勝之。循道會柯克私先生曰：余嘗在香港居若干日。特欲聞倫敦會何先生之講道。以助余之語言。且可得講經之法程。何先生誠奇人也。天才固超。而又得名士之訓練。故能造就如是。余此番得聆其講經多次。誠有益於余之說教也。觀此可見先生當日傳道感人之深矣。然先生深以華人受感而不求救為異。微問於先生。先生曰：姑俟之。以宗教動我國人。非易事。我人今日亦止能為真道之先驅耳。時將至。則上帝之能當顯現耳。先生身雖居港。而其勢力所感。正不限於一隅。有博羅人曰冀甘公者。嘗聞救道。得先生之教。因身入粵省內地。以道傳之。故鄉心如火熱。人目為狂。卒為道受害。然其後教會亦因之而成立焉。理博士見先生有著作才。嘗按月作勸世文一首。印刷散布。文詞係先生執筆。士林讀之。無不欽佩。又勸先生作新約註釋。先生欣然從之。先取西國註家亨理氏、司各德氏、巴耳痕氏之著作讀之。然後鏘和而出之。以己意成馬太馬可二卷。因教會初立。信士未衆。用經註者寥寥。故出版

後所銷有限。先生以此未免灰心。加以會務日繁。傳道之外。凡會友身家諸事。亦多與先生商榷。因此益無暇日。得成新約全註。誠爲可惜。然讀馬太註釋一卷。而起信者固不乏人。如區長老鳳墀。卽其一也。又著小冊一卷。曰登唐山取寶論。採經史之語。合於聖經者。輯以證道。先生在港傳道。二十餘年。如一日。一千八百七十年。先生年漸高。香港教會方議自立。而先生驟得中風之症。雖其勢頗微。而衰弱益甚。次年往廣州養病。二月疾甚。家人環集牀前。理雅各博士問以中心安樂否。先生答曰。余心甚安。惟仰恃基督之功勛。余久與上帝聯絡。已由基督而妥協。今固弗庸驚疑也。後遂昏沉。至四月二日乃卒。享年五十有四。子女共十五。第四子啓。字沃生。學於英國。爲香港律師。最有名。長女適伍博士廷芳。

教史氏曰。幼時讀馬太福音注釋。愛其淺顯明白。作者署名爲何進善。而不知爲誰。近讀理雅各博士所著先生傳略。始知先生固中國最先之牧師。而亦教會最先之著述家也。理氏與先生遊三十年。故知其一生最悉。深以先生未盡新約全註爲憾。誠以先

生之才之學。爲之固裕如也。無如當日求不逮供。則志士不免灰心。此蓋著述之遺憾。後進者能繼先生之志。通原文以成聖經註疏。固爲傳世之大業。然亦視教會之需求。果足以激起才士之奮發與否耳。

教主降生一千九百十六年二月初版刊行

(名教遺像一册  
定價大洋二角)

# 版權所有

著作校刊發印  
者者者者者者  
者者者者者者  
者者者者者者  
者者者者者者  
者者者者者者  
者者者者者者

古越謝洪賚  
黃稻孫  
中華基督教青年會全國協會  
民新社有限公司  
上海真山花園四號  
青年會書報發行所

## 布道之策勵

中國耶穌教會小史	每册一角半
聖教布道近史	三册五角四分
天國偉人	每册一角半
基督教與大國民	每册一角半
擇業要覽	每册一角半
傳道團詳解	每册一角半

青年會書報發行所  
發售

